



宋書卷七

本紀第七

前廢帝

前廢帝諱子業小字法師孝武帝長子也元嘉二十六年正月甲申生世祖鎮尋陽子業留京邑三十年世祖入伐元凶被囚侍中下省將見害者數矣卒得無恙世祖踐祚立為皇太子始未之東宮中庶子二率並入直永福省大明二年出東宮四年講孝經於崇正殿七年加元服八年閏五月庚申世祖崩其日太子即皇帝位大赦天下太宰江夏王義恭解尚書令加中書監驃騎大將軍柳元景加尚書令甲子置錄尚書太宰江夏王義恭錄尚書事驃騎大將軍柳元景加開府儀同三司丹陽尹永嘉王子仁為南豫州刺史六月辛未詔曰朕以眇身夙紹洪業敬御天威欽對靈命

仰遵凝緒日暮前圖寔可以拱默守成詒風長世而寶位告始萬
寓改屬惟德弗明昧于大道思宜睿範引茲簡恤可具詢執事詳
訪民隱凡曲令密文繁而作治關市儻稅事施一時而姦吏舞文
妄興威福加以氣緯舛玄偏頗滋甚宜其寬徭輕憲以救民切御
府諸署事不須廣雕文篆刻無施於今悉宜并省以酬氓願藩王
質貨一皆禁斷外便具條以聞戊寅以豫州之淮南郡復爲南梁
郡復分宣城還置淮南郡庚辰以南海太守表曇遠爲廣州刺史
秋七月己亥鎮軍將軍雍州刺史晉安王子勛改爲江州刺史中
護軍宗毅爲安西將軍雍州刺史鎮北將軍徐州刺史湘東王諱
爲護軍將軍中軍將軍義陽王昶爲征北將軍徐州刺史庚戌婆
皇國遣使獻方物崇皇太后曰太皇太后皇后曰皇太后乙卯罷
南北二馳道孝建以來所改制度還依元嘉丙辰追崇獻妃爲獻

皇后乙丑撫軍將軍南徐州刺史新安王子鸞解領司徒八月丁
卯領軍將軍王玄謨爲鎮北將軍南徐州刺史新安王子鸞爲青
冀二州刺史己巳以青冀二州刺史蕭惠開爲益州刺史己未皇
太后崩京師雨水庚子遣御史與官長隨宜賑恤九月辛丑護軍
將軍湘東王諱爲領軍將軍癸卯以尚書左僕射劉遵考爲特進
右光祿大夫乙卯文穆皇后祔葬景寧陵冬十月甲戌太常建安
王休仁爲護軍將軍戊寅輔國將軍宋越爲司州刺史庚辰原除
揚南徐州大明七年通租十二月乙酉以尚書右僕射顏師伯爲
尚書左僕射壬辰以王畿諸郡爲揚州以揚州爲東揚州癸巳以
車騎將軍揚州刺史豫章王子尚爲司徒揚州刺史去歲及是歲
東諸郡大旱甚者米一升數百京邑亦至百餘餓死者十有六七
孝建以來又立錢署鑄錢百姓因此盜鑄錢轉僞小商貨不行

永光元年春正月乙未朔

大赦天下乙巳省諸州臺傳戊午

以領軍將軍湘東王諱為衛將軍南豫州刺史護軍將軍建安王
休仁為領軍將軍祕書監山陽王休祐為豫州刺史左衛將軍桂
陽王休範為中護軍南豫州刺史尋陽王子房為東揚州刺史二
月丁丑減州郡縣田祿之半庚寅鑄二銖錢三月甲辰罷臨江郡
五月己亥割郢州隨郡屬雍州丙午以後軍司馬張牧為交州刺
史八月己巳左軍長史劉道隆為梁南秦二州刺史乙亥安西將
軍雍州刺史宗穀卒壬午衛將軍豫州刺史湘東王諱改為雍州
刺史尚書令驃騎大將軍柳元景加南豫州刺史秋八月辛酉越
騎校尉戴法興有罪賜死庚午以尚書左僕射顏師伯為尚書僕
射吏部尚書王景文為尚書右僕射癸酉帝自率宿衛兵誅太宰
江夏王義恭尚書令驃騎大將軍柳元景尚書僕射顏師伯廷尉

劉德願改元為景和元年文武賜位二等以領軍將軍建安王休
仁為安西將軍雍州刺史衛將軍湘東王諱還為南豫州刺史甲
戌司徒揚州刺史豫章王子尚領尚書令射聲校尉沈文秀為青
州刺史左軍司馬崔道固為冀州刺史乙亥詔曰昔凝神佇逸磻
溪讚道湛慮思才傳巖毗化朕位御三極風澄萬寓資鈇電斷正
卯斯戮思所以仰宣遺烈俯弘景祚每結夢庖鼎瞻言板築有劬
日晏無忘昧旦可甄訪郡國招聘閭部其有孝性忠節幽居遜棲
信誠義行廉正表俗文敏博識幹事治民務加旌舉隨才引擢庶
官克順彝倫咸叙王者精加詳括稱朕意焉以始興公沈慶之為
太尉鎮北將軍青冀二州刺史王玄謨為領軍將軍庚辰以石頭
城為長樂宮東府城為未央宮罷東揚州并揚州甲申以北邸為
建章宮南第為長揚宮以冠軍將軍邵陵王子元為湘州刺史丙

戊原除吳吳興義興晉陵琅邪五郡大明八年以前通租已丑復

立南北二馳道九月癸巳車駕幸湖熟奏鼓吹戊戌車駕還宮庚

子以南兗州刺史永嘉王子仁為南徐州刺史丹陽尹始安王子

真為南兗州刺史辛五撫軍將軍南徐州刺史新安王子鸞免為

庶人賜死丙午以兗州刺史薛安都為平北將軍徐州刺史丁未

衛將軍湘東王諱加開府儀同三司特進右光祿大夫劉遵考為

安西將軍南豫州刺史寧朔將軍殷孝祖為兗州刺史戊申以前

梁南秦二州刺史柳元怙復為梁南秦二州刺史己酉車駕討征

北將軍徐州刺史義陽王昶內外戒嚴昶奔于索虜辛亥右將軍

豫州刺史山陽王休祐進號鎮西大將軍甲寅以安西長史表顛

為雍州刺史戊午以左民尚書劉思考為益州刺史是日解嚴車

駕幸瓜步關百姓鑄錢冬十月癸亥曲赦徐州丙寅車駕還宮以

建安王休仁為護軍將軍己卯東陽太守王藻下獄死以官人謝

貴嬪為夫人加虎賁戟鸞輅龍旂出警入蹕實新蔡公主也乙

酉以鎮北大將軍豫州刺史山陽王休祐為鎮軍大將軍開府儀

同三司十一月壬辰寧朔將軍何邁下獄死新除太尉沈慶之薨

壬寅立皇后路氏四廂奏樂赦揚南徐二州護軍將軍建安王休

仁加特進左光祿大夫中護軍桂陽王休範遷職丁未皇子生少

府劉勝之子也大赦天下賊汙淫盜悉皆原除賜為父後者爵一

級王子以特進左光祿大夫護軍將軍建安王休仁為驃騎大將

軍開府儀同三司戊午南平王敬猷廬陵王敬先安南侯敬淵並

賜死時帝凶悖日甚誅殺相繼內外百司不保首領先是訛言云

湘中出天子帝將南巡荆湘二州以厭之先欲誅諸叔然後發引

太宗與左右阮佃夫王道隆李道兒密結帝左右壽寂之姜產之

允錫云
古今所
無

四時
七

等十一人謀共廢帝戊午夜帝於華林園竹林堂射鬼時巫覡云此堂有鬼故帝自射之壽寂之懷刀直入姜產之爲副帝欲走寂之追而殞之時年十七太皇太后令曰司徒領護軍八座子業雖曰嫡長少稟凶毒不仁不孝著自髻亂孝武棄世屬當辰曆自梓宮在殯喜容覲然天罰重離歡恣滋甚逼以內外維持忍虐未露而凶慘難抑一旦肆禍遂縱戮上宰殄害輔臣子鸞兄弟先帝鍾愛含怨既往枉加屠酷昶茂親作扞橫相徵討新蔡公主逼離夫族幽置深宮詭云薨殞襄事甫尔喪禮頓釋昏酣長夜庶事傾遺朝賢舊勳棄若遺土管絃不輟珍羞備膳詈辱祖考以爲戲謔行游莫止淫縱無度肆宴園陵規圖發掘誅剪無辜籍略婦女建樹僞豎莫知誰息拜嬪立后慶過恒典宗室密戚遇若婢僕鞭捶陵曳無復尊卑南平一門特鍾其酷反天滅理顯暴萬端苛罰酷令

終無紀極夏桀殷辛未足以譬闔朝業業人不自保百姓遑遑手足靡厝行穢禽獸罪盈三千高祖之業將泯七廟之享幾絕吾老疾沈篤每規禍鳩憂煎漏刻氣命無幾開闢以降所未嘗聞遠近思奮十室而九衛將軍湘東王體自太祖天縱英聖文皇鍾愛寵冠列藩吾早識神睿特兼常禮潛運宏規義士投袂獨夫旣殞懸首白旗社稷再興宗祏永固人鬼屬心大命允集且勲德高邈大業攸歸宜遵漢晉纂承皇極王者詳舊典以時奉行未亡人餘年不幸嬰此百艱永尋情事雖存若殞當復奈何當復奈何堊廢帝丹陽秣陵縣南郊壇西帝幼而狷急在東宮每爲世祖所責世祖西巡子業啟參承起居書迹不謹上詰讓之子業啟事陳謝上又答曰書不長進此是一條耳聞汝素都懈怠狷戾日甚何以頑固乃爾邪初踐阼受璽紱惇然無哀容始猶難諸大臣及戴法興等

既殺法興諸大臣莫不震懼於是又誅羣公元凱以下皆被毆捶牽曳內外危懼殿省騷然初太后疾篤遣呼帝帝曰病人間多鬼可畏那可往太后怒譖侍者將刀來破我腹那得生如此寧馨兒及太后崩後數日帝夢太后謂之曰汝不孝不仁本無人君之相子尚愚悖如此亦非運祚所及孝武險虐滅道怨結人神兒子雖多並無天命大運所歸應還文帝之子其後湘東王紹位果文帝子也故帝聚諸叔京邑慮在外爲患山陰公主淫恣過度謂帝曰妾與陛下雖男女有殊俱託體先帝陛下六宮萬數而妾惟駙馬一人事不均平一何至此帝乃爲主置面首左右三十人進爵會稽郡長公主秩同郡王侯湯沐邑二千戶給鼓吹一部加班劔二十人帝每出與朝臣常共陪輦主以吏部郎褚淵見美就帝請以自侍帝許之淵侍主十日備見逼迫誓死不回遂得免帝所幸闈

人華願兒官至散騎常侍加將軍帶郡少帝好講書頗識古事自造世祖諫及雜篇章往往有辭采以魏武帝有發丘中郎將摸金校尉乃置此二官以建安王休祐領之其餘事迹分見諸列傳史臣曰廢帝之事行著于篇若夫武王數殷紂之豐不能絀其萬一霍光書昌邑之過未足舉其毫釐假以中才之君有一于此足以實社殘宗污宮豬廟況總斯惡以萃一人之體乎其得亡亦爲幸矣

宋書卷七 本紀第七終

宋書卷八

本紀第八

明帝

蘇州鳳臺氏雷應南甫

太宗明皇帝諱彧字休炳小字榮期文帝第十一子也元嘉十六年十月戊寅生二十五年封淮陽王食邑二千戶二十九年改封湘東王元凶弒立以為驍騎將軍加給事中世祖踐祚為祕書監遷冠軍將軍南蘭陵下邳二郡太守領石頭戍事孝建元年徙為南彭城東海二郡太守將軍如故鎮京口其年徵為中護軍二年遷侍中領游擊將軍三年徙衛尉侍中如故又為左衛將軍衛尉如故大明元年轉中護軍衛尉如故三年為都官尚書領游擊將軍衛尉如故七年遷領軍將軍八年出為使持節都督徐兗二州豫州之梁郡諸軍事鎮北將軍徐州刺史給鼓吹一部其年徵為

侍中護軍將軍未拜復爲領軍將軍侍中如故永光元年又出爲使持節散騎常侍都督南豫豫司江四州揚州之宣城諸軍事衛將軍南豫州刺史鎮姑熟又徙爲都督雍梁南北秦四州郢州之竟陵諸軍事寧蠻校尉雍州刺史持節常侍將軍如故未拜復本位尋以本號開府儀同三司廢帝景和末上入朝被留停都廢帝誅害宰輔殺戮大臣恒慮有圖之者疑畏諸父並拘之殿內遇上無禮事在文諸王傳遂收上付廷尉一宿被原將加禍害者前後非一旣而害上意定明旦便應就禍上先已與腹心阮佃夫李道兒等密共合謀于時廢帝左右常慮禍及人人有異志唯有直閣將軍宋越譚金童太一等數人爲其腹心並號虎有幹亦在殿省久衆並畏服之故莫敢動是夕越等並外宿佃夫道兒因結壽寂之等殞廢帝於後堂十一月二十九日夜也事定上未知所爲建

安王休仁便稱臣奉引升西堂登御坐召見諸大臣于時事起倉卒上失履跣至西堂猶著烏帽坐定休仁呼主衣以白帽代之令備羽儀雖未卽位凡衆事悉稱令書施行己未司徒揚州刺史豫章王子尚山陰公主並賜死宋越譚金童太一謀反伏誅十二月庚申朔令書以司空東海王禕爲中書監太尉鎮軍將軍江州刺史晉安王子勛進號車騎將軍開府儀同三司癸亥以新除驃騎大將軍建安王休仁爲司徒尚書令揚州刺史鎮軍將軍開府儀同三司山陽王休祐進號驃騎大將軍荊州刺史崇憲衛尉桂陽王休範爲鎮北將軍南徐州刺史乙丑改封安陸王子綏爲江夏王

泰始元年冬十二月丙寅上卽皇帝位詔曰高祖武皇帝德洞四

亂日月所照梯山航海風雨所均削衽襲帶所以業固盛漢聲溢
隆周子業凶器自天忍悖成性人面獸心見於韶日反道敗德著
自比年其狎侮五常怠棄三正矯誣上天毒流下國寔開闢所未
有書契所未聞再罹邊密而無一日之哀齊斬在躬方深北里之
樂虎兕難匣憑河必彰遂誅滅上宰窮豐逆之酷虐害國輔究孥
戮之刑子鸞同生以昔憾殄殪敬猷兄弟以睚眦殲夷徵逼義陽
將加屠膾陵辱戚藩檀楚妃主奪立左右竊子置儲肆酗于朝宣
淫于國事穢東陵行汗飛走積豐罔極日月滋深比遂圖犯玄宮
志窺題湊將肆梟鏡之禍騁商頓之心又欲鴆毒崇憲虐加諸父
事均宮闈聲徧國都鴟梟小豎莫不寵暱朝廷忠誠必加戮挫收
掩之旨號虎結轍掠奪之使白刃相望百僚危氣首領無有全地
萬姓崩心妻子不復相保所以鬼哭山鳴星鈞血降神器殆于馭

索景祚危於綴旒朕假寐凝憂泣血待旦慮大宋之基於焉而泯
武文之業將墜於淵賴七廟之靈藉八百之慶巨猾斯殄鴻沚時
纂皇綱絕而復紐天緯缺而更張猥以寡薄屬承乾統上緝三光
之重俯顧庶民之艱業業矜矜若履冰谷思與億兆同此維新可
大赦天下改景和元年爲泰始元年賜民爵二級鰥寡孤獨不能
自存者人穀五斛逋租宿債勿復收犯鄉論清議贓污淫盜並悉
先除長徒之身特賜原遣亡官失爵禁錮舊勞一依舊典其昏制
謬封並皆刊削已巳以安西將軍南豫州刺史劉遵考爲特進右
光祿大夫輔國將軍歷陽南譙二郡太守建平王景素爲南豫州
刺史庚午以荊州刺史臨海王子頊爲鎮軍將軍徐州刺史永嘉
王子仁爲中軍將軍左衛將軍劉道隆爲中護軍辛未改封臨賀
王子產爲南平王晉熙王子輿爲廬陵王壬申以尚書左僕射王

景文爲尚書僕射新除中護軍劉道隆卒壬午詔曰朕戡亂寧民屬膺景祚鴻制初造革道惟新而國故頻羅仁澤偏壅每鑒寐疚心罔識攸濟巡方問俗弘政所先可分遣大使廣求民瘼考守宰之良采衡閭之善若獄犴淹枉傷民害教者具以事聞鰥寡孤獨癯殘六疾不能自存者郡縣優量賑給貞婦孝子高行力田許悉條奏務詢輿誦廣納嘉謀每益皇華之旨俾若朕親覽焉乙亥追尊所生沈婕妤曰宣皇太后後軍將軍垣閔爲司州刺史前右將軍長史殷琰爲豫州刺史丙子詔曰皇室多故糜費滋廣且久歲不登公私歉弊方刻意從儉弘濟時艱政道未孚慨愧兼積大官供膳可詳所減撤尚方御府雕文篆刻無益之物一皆蠲省務存簡約以稱朕心戊寅崇太后爲崇憲皇太后立皇后王氏鎮軍將軍江州刺史晉安王子勛舉兵反鎮軍長史劉琬爲其謀主雍州

崇太后
作太皇太后
鄧

刺史袁顛率衆赴之辛巳驃騎大將軍前荊州刺史山陽王休祐改爲江州刺史荊州刺史臨海王子項卽留本任加領軍將軍王玄謨鎮軍將軍壬午車駕謁太廟甲申後將軍郢州刺史安陸王子綏進號征南將軍右將軍會稽太守尋陽王子房進號安東將軍前將軍荊州刺史臨海王子項進號平西將軍子綏子房子項並不受命舉兵同逆戊子新除中軍將軍永嘉王子仁爲護軍將軍

二年春正月己丑朔以軍事不朝會庚寅以金紫光祿大夫王僧朗爲左光祿大夫開府儀同三司壬辰驃騎大將軍江州刺史山陽王休祐改爲南豫州刺史鎮歷陽鎮軍將軍領軍將軍王玄謨爲車騎將軍江州刺史平北將軍徐州刺史薛安都進號安北將軍安都亦不受命癸巳以左衛將軍巴陵王休若爲鎮東將軍新

除安東將軍尋陽王子房為撫軍將軍司徒左長史表愍孫為領
軍將軍甲午中外戒嚴司徒建安王休仁都督征討諸軍事統眾
軍南討以青州刺史劉祗為南兗州刺史丙申以征虜司馬申令
孫為徐州刺史義陽內史龐孟蚪為司州刺史申令孫孟蚪及豫
州刺史殷琰青州刺史沈文秀冀州刺史崔道固湘州行事何慧
文廣州刺史表曇遠益州刺史蕭惠開梁州刺史柳元怙並同叛
逆兗州刺史殷孝祖入衛京都仍遣孝祖前鋒南伐甲辰加孝祖
撫軍將軍丙午車駕親御六師出頓中興堂辛亥驃騎大將軍南
豫州刺史山陽王休祐改為豫州刺史統眾軍西討吳郡太守顧
琛吳興太守王曇生義興太守劉延熙晉陵太守表標山陽太守
程天祚並舉兵及鎮東將軍巴陵王休若統眾軍東討壬子崇憲
皇太后崩是日軍主任農夫劉懷珍平定義興永世縣民史逸宗

陳九錫
西討申
令孫等

東討
顧琛

據縣為逆殿中將軍陸攸之討平之丙辰以新除左光祿大夫開
府儀同三司王僧朗為特進左光祿大夫如故二月乙丑僧朗卒
尚書僕射王景文父憂去職曲赦吳興義興晉陵四郡吏部尚
書蔡興宗為尚書左僕射吳興太守張永右軍將軍齊王東討平
晉陵癸未曲赦浙江東五郡丁亥鎮東將軍巴陵王休若進號衛
將軍建武將軍吳嘉公率諸軍破賊於吳吳興會稽平定三郡同
逆皆伏誅輔國將軍齊王前鋒北討輔國將軍劉劬前鋒南討賊
劉胡領眾四萬據赭圻三月庚寅撫軍將軍沈攸之代為南討前
鋒賊眾稍盛表顛顛鵲尾聯營迄至濃湖眾十餘萬壬辰以新除
太子詹事張永為青冀二州刺史丙申鎮北將軍南徐州刺史桂
陽王休範總統北討諸軍事丁酉以尚書劉思考為徐州刺史戊
戌貶尋陽王子房爵為松滋縣侯乙巳以奉朝請鄭黑為司州刺

左史作右

善

西
據史增入

北討
薛安都

史辛亥鎮北將軍南徐州刺史桂陽王休範領南兗州刺史壬子
斷新錢專用古錢癸丑原赦揚南徐二州囚繫凡逋亡一無所問
夏四月壬午以散騎侍郎明僧暲為青州刺史五月壬辰以輔國
將軍沈攸之為雍州刺史丁酉曲赦豫州丁未新除尚書僕射王
景文為中軍將軍以青冀二州刺史張永為鎮軍將軍庚戌以寧
朔將軍劉乘民為冀州刺史甲寅葬崇憲皇太后於攸寧陵冠軍
將軍益州刺史蕭惠開進號平西將軍六月辛酉鎮軍將軍張永
領徐州刺史京師雨水丁卯遣殿中將軍檢行賜卹以左軍將軍
垣恭祖為梁南秦二州刺史秋七月己丑鎮北將軍南徐兗二州
刺史桂陽王休範進號征北大將軍辛卯鎮軍將軍徐州刺史張
永改為南兗州刺史丁酉以仇池太守楊僧嗣為北秦州刺史武
都王壬寅以男子時朗之為北豫州刺史乙巳龍驤將軍劉道符

副史作嗣
此疑刊

平山陽辛亥人以義軍主鄭叔舉為北豫州刺史鎮軍將軍南兗
州刺史張永復領徐州刺史甲寅復以冀州刺史崔道固為徐州
刺史八月己卯司徒建安王休仁率眾軍大破賊斬偽尚書僕射
袁顓進討江郢荆雍湘五州平定之晉安王子勛安陸王子綏臨
海王子瑱邵陵王子元並賜死同黨皆伏誅諸將軍帥封賞各有
差甲申以護軍將軍永嘉王子仁為平南將軍湘州刺史九月乙
酉曲赦江郢荆雍湘五州守宰不得離職壬辰驃騎大將軍豫州
刺史山陽王休祐改為荊州刺史分豫州立南豫州癸巳六軍解
嚴大赦天下賜民爵一級甲午以中軍將軍王景文為安南將軍
江州刺史戊戌以車騎將軍江州刺史王玄謨為左光祿大夫開
府儀同三司護軍將軍庚子以建安王休仁世子伯融為豫州刺
史辛丑衛將軍巴陵王休若即本號為雍州刺史雍州刺史沈攸

又

護軍吏
有領字

之爲郢州刺史庚戌以太子左衛率建平王景素爲南兗州刺史
十月乙卯永嘉王子仁始安王子真淮南王子孟南平王子產廬
陵王子輿松滋侯子房並賜死丁卯以郢州刺史沈攸之爲中領
軍與張永俱北討庚午以吳郡太守顧顛之爲湘州刺史戊寅立
皇子昱爲皇太子曲赦揚徐二州以輔國將軍劉劭爲廣州刺史
左軍將軍張世爲豫州刺史十一月甲申以安成太守劉襲爲郢
州刺史壬辰詔曰治崇簡易化疾繁侈遠關隆替明著軌跡者也
朕拯斯隆運屬此屯極仍之以凋耗因之以師旅而識昧前王務
艱昔代俾夫舊賦旣繁爲費彌廣監寐萬務每思弘革方欲緩絲
優調愛民爲先有司詳加寬惠更立科品其方物職貢各順土宜
出獻納貢敬依時令凡諸蠹俗妨民之事趣末違本之業雕華靡
麗竒器異設並嚴加裁斷務歸要實左右尚方御府諸署供御制

造成存儉約庶淳風至教微遵太古阜財興讓少敦季俗又詔曰
矢機詢政立教之攸本舉賢聘逸弘化之所基故負鼎進策殷代
以康釋釣作輔周祚斯久朕甫承大業訓道未敷雖側席忠規竚
夢巖築而良圖莫薦竒士弗聞永鑒通古無忘宵寐今藩隅克晏
敷化維始屢懷存治寔望箴闕王公卿尹羣僚庶官其有嘉謀直
獻匡俗濟時咸切事陳奏無或依隱若乃林澤貞栖丘園耿潔博
洽古今敦崇孝讓四方在任可明書搜揚具卽以聞隨就褒立以
建平王景素子延年爲新安王以新除左光祿大夫開府儀同三
司王玄謨爲車騎將軍南豫州刺史丙申制使東土經荒流散並
各還本蠲衆調二年十二月己未以尚書金部郎劉善明爲冀州
刺史乙丑詔曰近衆藩稱亂多滌豐科或誠係本朝事緣逼迫混
同證錮良以悵然夫天道尚仁德刑並用雷霆時至雲雨必解朕

三年春正月張永等棄城夜遁由是失淮北州及豫州淮西地。裴子野論曰晉齊桓於葵丘而九國叛曹公不祀張松而天下分一失道者其差遠矣。太宗初威令所被不滿百里卒有離心士無固色而無能開誠心布款實莫不感恩服德致命效死故西摧北蕩富內塞開既而

既而六軍獻捷方陽東手天子欲買其餘威師出無名長淮以北倏忽為我惜乎。若以嚮之虛懷不驕不伐則三叛奚為而叛哉。高祖蠲風生介冑。經略疆場。後之子孫。日感百里播種。堂構豈云易哉。

眷言靜念思弘風俗凡應禁削皆從原蕩其文武堪能隨才詮用辛未以新除廣州刺史劉劬為益州刺史前巴西梓潼二郡太守費混為廣州刺史劉劬克壽陽豫州平辛巳以輔國將軍劉靈道為梁南秦二州刺史薛安都要引索虜張永沈攸之大敗於是遂失淮北四州及豫州淮西地

三年春正月庚子以農役將興太官停宰牛癸卯曲赦豫南豫三州衛將軍巴陵王休若降號鎮西將軍閏月庚午肅師大雨雪遣使巡行賑賜各有差戊寅以游擊將軍垣闓為益州刺史二月甲申以御史中丞羊南為廣州刺史是日車駕為戰亡將士舉哀己丑以鎮西司馬劉亮為梁南秦二州刺史索虜寇汝陰太守張景遠擊破之丙申曲赦青冀二州三月丙子以尚書左僕射蔡興宗為安西將軍郢州刺史戊寅以冠軍將軍王玄載為徐州刺史寧

朔將軍崔平為兗州刺史夏四月癸巳以前司州刺史鄭黑為司州刺史乙未冠軍將軍北秦州刺史楊僧嗣進號征西將軍庚子立桂陽王休範第二子德嗣為廬陵王立侍中劉韞第二子銑為南豐王丙午安西將軍蔡興宗降號平西將軍五月丙辰宣太后崇寧陵禁內墳屋瘞遷徙者給葬直蠲復家丁戊午以車騎將軍南兗州刺史王玄謨為左光祿大夫開府儀同三司辛酉罷南豫州并豫州壬戌以太子詹事袁粲為尚書僕射六月乙酉以侍中劉韞為湘州刺史秋七月壬子以左光祿大夫開府儀同三司王玄謨為特進左光祿大夫護軍將軍薛安都子伯令略據雍州四郡刺史巴陵王休若討斬之八月丁酉詔曰古者衡虞置制蠶氓不收川澤產育登器進御所以繁阜民財養遂生德頃商販逐末競早爭新折未實之果收豪家之利籠非膳之翼為戲童之資豈

所以還風尚本捐華務實宜修道布仁以革斯蠹自今鱗介羽毛
看核衆品非時月可采器味所須可一皆禁斷嚴爲科制壬寅以
中領軍沈攸之行南兗州刺史率衆北討癸卯詔曰法網之用期
世而行寬惠之道因時而布况朕尚德戡亂依仁馭俗宜每就弘
簡以隆至治而頻罹兵革繇賦未休軍民巧僞興事甚多蹈刑入
憲諒非一科至乃假名戎伍竊爵私庭因戰散亡託懼逃役且往
諸淪逼雖經累宥逋竄之黨猶爲寔繁宵言永懷良兼矜疚思所
以重播至澤覃被區宇可大赦天下加新除左光祿大夫王玄謨
車騎將軍丙午遣吏部尚書褚淵慰勞緣淮將帥隨宜量賜戊申
以新除右衛將軍劉劭爲豫州刺史九月癸丑鎮西將軍雍州刺
史巴陵王休若進號衛將軍平西將軍郢州刺史蔡興宗進號安
西將軍乙卯以越騎校尉周寧民爲兗州刺史戊午以皇后六宮

以下雜衣千領金釵千枚班賜北征將士庚申前將軍兼冀州刺
史崔道固進號平北將軍甲子曲赦徐兗青冀四州冬十月壬午
改封新安王延年爲始平王戊子芮芮國遣使獻方物辛丑復郡
縣公田鎮西大將軍西秦河二州刺史吐谷渾拾寅進號征西大
將軍十一月立建安王休仁第二子伯猷爲江夏王改封義陽王
昶爲晉熙王乙卯分徐州置東徐州以輔國將軍張讜爲刺史高
麗國百濟國遣使獻方物十二月庚辰以寧朔將軍劉休賓爲兗
州刺史

四年春正月己未車駕親祠南郊大赦天下庚午衛將軍巴陵王
休若降號左將軍乙亥零陵王司馬勗薨二月辛丑以前龍驤將
軍常珍奇爲平北將軍司州刺史珍奇子超越爲北冀州刺史乙
巳右光祿大夫車騎將軍護軍將軍王玄謨薨三月己未以游擊

將軍劉懷珍爲東徐州刺史戊辰以軍司馬劉靈遺爲梁南秦二州刺史南譙太守孫奉伯爲交州刺史交州人李長仁據州叛妖賊攻廣州殺刺史羊南龍驤將軍陳伯紹討平之夏四月己卯復減郡縣田租之半東海王禕改封廬江王山陽王休祐改封晉平王改晉安郡爲晉平郡辛丑芮芮國及河南王並遣使獻方物甲辰以豫章太守張辯爲廣州刺史五月乙未曲赦廣州癸亥以行雒州刺史巴陵王休若行湘州刺史會稽太守張永爲雒州刺史湘州刺史劉韞爲南兗州刺史秋七月乙巳朔以吳郡太守王琨爲中領軍丙辰始平王延年薨己未以侍中劉襲爲中護軍庚申以驍騎將軍齊王爲南兗州刺史八月戊子以南康相劉勃爲交州刺史辛卯分青州置東青州以輔國將軍沈文靖爲東青州刺史丁酉安南將軍江州刺史王景文進號鎮南將軍九月丙辰以

驃騎長史張悅爲雒州刺史戊辰詔曰夫愆有小大憲隨寬猛故五刑殊用三典異施而降辟次網便暨鉗撻求之法科差品滋遠朕務存欽卹每有矜貸尋劾制科罪輕重同之大辟卽事原情未爲詳衷自今凡竊執官仗拒戰邏司或攻剽亭寺及害吏民者凡此諸條悉依舊制五人以下相逼奪者可特賜黜削投畀四遠仍用代殺方古爲優全命長戶施同造物庶簡惠之化有孚羣萌好生之德無漏幽品庚午曲赦揚南徐兗豫四州冬十月癸酉朔日有蝕之發諸州兵北討南康建安安成宣城四郡悉不同南逆並不在徵發之例甲戌割揚州之義興郡屬南徐州五年春正月癸亥車駕躬耕籍田大赦天下賜力田爵一級二月丙申分豫州揚州立南豫州以太尉廬江王禕爲車騎將軍開府儀同三司南豫州刺史三月乙卯於南豫州立南義陽郡丙寅車

史有云
起青州
史沈文靖
賜西字

駕幸中堂聽訟巳巳河南王遣使獻方物夏四月辛未割雍州隨郡屬郢州乙酉割豫州義陽郡屬郢州郢州西陽郡屬豫州戊子以寧朔將軍崔公烈爲兗州刺史戊戌新除給事黃門侍郎杜幼文爲梁南秦二州刺史六月辛未晉平王休祐子宣曜爲南平王壬申以安西將軍郢州刺史蔡興宗爲鎮東將軍癸酉以左衛將軍沈攸之爲郢州刺史以軍興已來百官斷俸並給生食丁丑車騎將軍南豫州刺史廬江王禧免官爵戊寅以左將軍行湘州刺史巴陵王休若爲征南將軍湘州刺史壬午罷南豫州丙戌以新除給事黃門侍郎劉亮爲益州刺史秋七月巳酉以輔國將軍王亮爲徐州刺史東莞太守陳伯紹爲交州刺史甲寅以山陽太守李靈謙爲兗州刺史壬戌改輔國將軍爲輔師將軍八月巳丑以右將軍行豫州刺史劉劬爲平西將軍豫州刺史壬辰以海陵太

守劉崇智爲冀州刺史九月甲寅立長沙王纂子延之爲始平王戊午中領軍王琨遷職巳未詔曰夫箕穎之操振古所貴沖素之風哲王攸重朕屬橫流之會接難晦之辰龕暴剪亂日不暇給今雖關隴猶靄區縣澄氛偃武修文於是乎在思崇廉恥用靜馳薄固已物色載懷寢興竚歎其有貞栖隱約自事衡樊鑿坏遺榮負釣辭聘志恬江海行高塵俗者在所精加搜括時以名聞將貴園矜德茂昭厥禮羣司各舉所知以時授爵乙丑以新除平西將軍豫州刺史劉劬爲中領軍冬十月丁卯朔日有蝕之十一月丁未索虜遣使獻方物閏月戊子驃騎大將軍荊州刺史晉平王休祐以本號爲南徐州刺史征南將軍湘州刺史巴陵王休若爲征西將軍荊州刺史輔師將軍孟陽爲兗州刺史義陽太守呂安國爲司州刺史十二月戊戌司徒建安王休仁解揚州刺史巳未以征

北大將軍南徐州刺史桂陽王休範為中書監中將軍揚州刺史
吳興太守建平王景素為湘州刺史輔師將軍建安王世子融為
廣州刺史庚申分荆益州五郡置三巴校尉

六年春正月乙亥初制間二年一祭南郊間一年一祭明堂二月

壬寅司徒建安王休仁為太尉領司徒癸丑皇太子納妃甲寅大

赦天下巧注從軍不在赦例班賜各有差三月乙亥中護軍劉襲

卒丁丑以太子詹事張永為護軍將軍夏四月癸亥立第六皇子

燮為晉熙王五月丁丑以前軍將軍陳胤宗為徐州刺史丁亥以

冠軍將軍吐谷渾拾虔為平西將軍戊子奉朝請孔玉為寧州刺

史六月己亥以第五皇子智井繼東平沖王休倩庚子以侍中劉

韞為撫軍將軍雍州刺史前將軍郢州刺史沈攸之進號鎮軍將軍

揚州刺史桂陽王休範為征南大將軍江州刺史癸卯以鎮南將

軍江州刺史王景文為尚書左僕射揚州刺史尚書僕射袁粲為

尚書右僕射己未改臨賀郡為臨慶郡追改東平王休倩為臨慶

沖王七月丙戌第五皇子智井薨九月乙丑中領軍劉劭加平北

將軍戊寅立總明觀徵學士以充之置東觀祭酒癸未以第八皇

子智渙繼臨慶沖王休倩冬十月辛卯立第九皇子贊為武陵王

乙巳以前右軍馬銑為北雍州刺史己酉車駕幸東堂聽訟十一

月己巳高麗國遣使獻方物十二月癸巳以邊難未息制父母陷

異域悉使婚宦戊戌以始興郡為宋安郡丙辰護軍將軍張永遷

職

七年春正月甲戌置散騎奏舉郎二月癸巳征南大將軍荊州刺

史巴陵王休若進號征西大將軍開府儀同三司戊戌置百梁隴

蘇永寧安昌富昌南流郡又分廣交州三郡合九郡立越州己亥

州刺史高
軍中書
張暢傳云
年於巴郡
三巴校尉
在五年未詳

祭酒下史有
計舉各人
舉士之分
為儒道吏
陰陽等學
言陰陽者
無其人也

永

以前將軍劉康爲平東將軍妖寇宋逸攻合肥殺汝陰太守王穆之郡縣討平之甲寅驃騎大將軍開府儀同三司南徐州刺史晉平王休祐薨戊午以征西大將軍荊州刺史巴陵王休若爲征北大將軍南徐州刺史湘州刺史建平王景素爲荊州刺史三月辛酉索虜遣使獻方物壬戌芮芮國遣使奉獻夏四月辛丑減天下死罪一等凡敕繫悉遣之甲辰於南兗州置新平郡癸丑金紫光祿大夫張永領護軍五月戊午司徒建安王休仁有罪自殺辛酉以寧朔長史孫超之爲廣州刺史尚書左僕射揚州刺史王景文以刺史領中書監庚午以尚書右僕射袁粲爲尚書令新除吏部尚書褚淵爲尚書左僕射辛未監吳郡王僧虔行湘州刺史丙戌追免晉平王休祐爲庶人六月丁酉以征南大將軍江州刺史桂陽王休範爲驃騎大將軍南徐州刺史征北大將軍巴陵王休若

爲車騎大將軍江州刺史甲辰芮芮國遣使獻方物秋七月丁巳罷散騎奏舉郎乙丑新除車騎大將軍江州刺史巴陵王休若薨桂陽王休範以新除驃騎大將軍還爲江州庚午以第三皇子準爲撫軍將軍辛未以太子詹事劉秉爲南徐州刺史戊寅以寧朔將軍沈懷明爲南兗州刺史乙酉於冀州置西海郡八月戊子第八皇子躋繼江夏文獻王義恭庚寅以疾愈大赦天下冀州刺史劉崇智加青州刺史戊戌立第三皇子準爲安成王九月辛未以越騎校尉周寧民爲徐州刺史冬十月戊午百濟國遣使獻方物十二月丁酉分豫州南兗州立南豫州以歷陽太守王玄載爲南豫州刺史

泰豫元年春正月甲寅朔上有疾不朝會以疾患未痊故改元賜孤老貧疾粟帛各有差戊午皇太子會萬國於東宮并受貢計二

月辛丑以給事黃門侍郎王瞻爲司州刺史二月癸丑朔林邑國遣使獻方物己未中書監楊州刺史王景文卒夏四月辛卯以撫軍司馬蔡那爲益州刺史癸巳以右衛將軍張興爲雍州刺史己亥上大漸驃騎大將軍江州刺史桂陽王休範進位司空尚書右僕射褚淵爲護軍將軍中領軍劉劭加尚書右僕射鎮東將軍蔡興宗爲征西將軍開府儀同三司荊州刺史鎮軍將軍郢州刺史沈攸之進號安西將軍詔曰朕自臨御億兆仍屬戎寇雖每存弘化而惠弗覃遠軍國凋弊刑訟未息今大漸維危載深矜歎可緩徭優調去繁就約因改之宜詳有簡衷務以愛民爲先以宣朕遺意表蔡褚淵劉劭蔡興宗沈攸之同被顧命是日上崩於景福殿時年三十四五月戊寅葬臨沂縣莫府山高寧陵帝少而和令風姿端雅早失所生養於太后宮內大明世諸弟多被猜忌唯上見

親常侍路太后醫藥好讀書愛文義在藩時撰江左以來文章志又續衛瓘所註論語二卷行於世及卽大位四方反叛以寬仁待物諸軍帥有父兄子弟同逆者並授以禁兵委任不易故衆爲之用莫不盡力平定天下逆黨多被全其有才能者並見授用有如舊臣才學之士多蒙引進參侍文籍應對左右於華林園芳堂講周易常自臨聽末年妖鬼神多忌諱言語文書有禍敗凶喪及疑似之言應回避者數百千品有犯必加臠戮改駟爲邊瓜亦以駟字似禍字故也以南苑借張永云且給二百年期訖更啟其事類皆如此宣陽門民間謂之白門上以白門之名不祥甚諱之尚書右丞江謐嘗誤犯上變色曰白汝家門謐稽顙謝久之方釋太后停屍漆牀先出東宮上嘗幸官見之怒甚免中庶子官職局以之坐者數十人內外常慮犯觸人不自保宮內禁忌尤甚移牀治壁

必先祭土神及文士爲文詞祝策如大祭饗泰始泰豫之際更忍
虐好殺左右失旨忤意往往有斲剝斷截者時經略淮泗軍旅不
息荒弊積久府藏空竭內外百官並日料祿奉而上奢費過度務
爲雕侈每所造制必爲正御三十副御次副又各三十須一物輒
造九十枚天下騷然民不堪命其餘事迹別見衆篇親近讒慝剪
落皇枝宋氏之業自此衰矣

史臣曰聖人立法垂制所以必稱先王蓋由遺訓餘風足以貽之
來世也太祖負扆南面實有君人之懿焉經國之義雖弘而隆家
之道不足彭城王照不窺古本無卓爾之姿徒見昆弟之義未識
君臣之禮冀以此家情行之國道主猜而猶犯恩薄而未悟致以
呵訓之微行遂成滅親之大禍開端樹隙垂之後人雖天倫之重
義殊凡歲而中人以下情由恩變至於易衣而出分苦而食與夫

別宮異門形疎事隔者宜有降矣太宗因易隙之情據已行之典
剪落洪枝願不待慮旣而本根無庇幼主孤立神器以勢弱傾移
靈命隨樂推回改斯益履霜有漸堅冰自至所從來遠也

此卷增殷孝祖之十三字可爲盡快極適也仲子記

宋書卷八 本紀第八 終

藝文志卷八

宋書卷九

藝文志卷九

本紀第九

後廢帝

廢帝諱昱字德融小字慧震明帝長子也大明七年正月辛丑生於衛尉府太宗諸子在孕皆以周易筮之卽以所得之卦爲小字故帝字慧震其餘王子亦如之泰始二年立爲皇太子三年始制太子改名昱安車乘象輅六年出東宮又制太子元正朝賀服袞冕九章衣泰豫元年四月己亥太宗崩庚子太子卽皇帝位大赦天下尚書令袁粲護軍將軍褚淵共輔朝政乙巳以護軍將軍張永爲右光祿大夫撫軍將軍安成王爲揚州刺史己酉特進右光祿大夫劉遵考改爲左光祿大夫五月丁巳以吳興太守張岱爲益州刺史戊辰緣江戍兵老疾者悉聽還班劔依舊入殿六月壬

辰詔曰夫興王經制寔先民隱方求廣教刑於四維朕以笑眇夙
膺寶歷永言民政未接聽覽眷言乃顧無忘鑿寐可遣大使分行
四方觀采風謠問其疾苦有拂民法不便俗者悉各條奏若守宰
威恩可紀廉勤允著依事騰聞如獄訟誣枉職事紕繆惰公存私
害民利己者無或隱昧廣納芻輿之議博求獻藝之規巡省之道
務令精洽深簡行識俾若朕親覽焉又詔曰夫寢夢期賢往誥垂
美物色求良前書稱盛朕以冲昧嗣膺寶業思仰述聖猷勉弘政
道與言多士常想得人可普下牧守廣加搜采其有孝友聞族義
讓光閭或隱名屠釣隱身耕牧足以整厲澆風扶益淳化者凡厥
一善咸無遺逸虛輪佇帛俟聞嘉薦京師雨水詔賑卹二縣貧民
乙巳尊皇后曰皇太后立皇后江氏秋七月戊辰崇拜帝所生陳
貴妃爲皇太妃閏月丁亥罷宋安郡還屬廣興已丑割南豫州南

汝陰郡屬西豫州西豫州廬江郡屬豫州甲辰以新除征西將軍
開府儀同三司荊州刺史蔡興宗爲中書監光祿大夫安西將軍
郢州刺史沈攸之爲鎮西將軍荊州刺史南徐州刺史劉秉爲平
西將軍郢州刺史新除太常建平王景素爲鎮軍將軍南徐州刺
史八月戊午新除中書監左光祿大夫開府儀同三司蔡興宗薨
冬十月辛卯撫軍將軍劉韞有罪免官辛未護軍將軍褚淵母憂
去職十一月己亥新除平西將軍郢州刺史劉秉爲尚書左僕射
辛丑護軍將軍褚淵還攝本任芮芮國高麗國遣使獻方物十二
月索虜寇義陽丁巳司州刺史王瞻擊破之

元徽元年春正月戊寅朔改元大赦天下壬寅詔曰夫緩法昭恩
裁風茂典蠲憲貸眚訓俗彞義朕臨馭宸樞寅制氓寓式存寬簡
思孚矜惠今開元肆宥萬品惟新凡茲流斥宜均弘洗自元年以

前貽罪徙放者悉聽還本土二月乙亥以晉熙王燮爲郢州刺史
三月丙申以撫軍長史何恢爲廣州刺史婆利國遣使獻方物戊
戌以前淮南太守劉靈遺爲南豫州刺史夏五月辛卯以輔師將
軍李安民爲司州刺史丙申河南王遣使獻方物六月壬子以越
州刺史陳伯紹爲交州刺史乙卯特進左光祿大夫劉遵考卒壽
陽大水己未遣殿中將軍賑卹慰勞丙寅以左軍將軍孟次陽爲
兗州刺史秋七月丁丑散騎常侍顧長康長水校尉何翌之表上
所撰諫林上自虞舜下及晉武凡十二卷八月辛亥詔曰分方正
俗著自虞冊川谷異制煥乎姬典故并遂有辨閭伍無雜用能七
教克宣八政斯序雖綿代殊軌公革異儀或民懷遷俗或國尚興
徙漢陽列燕代之豪關西熾齊楚之族並通籍新邑卽居成舊洎
金行委御禮樂南移中州黎庶襁負揚越聖武造運道一闕區貽

長世之規申土斷之制而夷險相因盈晦遞襲歲饑流戎役情
散違鄉寓境漸至繁積宜式遵鴻軌以爲永憲庶阜俗昌民反風
定保夷胥山之險澄澣海之波括河圖於九服振玉軻於五都矣
祕書丞王儉表上所撰七志三十卷京師早甲寅詔曰比亢序騫
度留熏燿畧有傷秋稼方貽民瘼朕以眇疚未弘政道囹圄尚繁
枉滯猶積夕厲晨矜每惻于懷尚書令可與執法以下就訊衆獄
使冤訟洗遂因弊昭蘇頒下州郡咸令無壅癸亥鎮軍將軍南徐
州刺史建平王景素進號鎮北將軍庚午陳留王曹銑薨九月壬
午詔曰國賦氓稅蓋有恒品往屬戎難務先軍實徵課之宜或乖
昔准湘江二州糧運偏積調役旣繁庶徒彌擾因循權政容有未
革民單力弊歲月愈甚永言矜歎情兼宵寐可遣使到所明加詳
察其輸違舊令役非公限者並卽蠲改具條以聞丁亥立衡陽王

疑子伯玉為南平王冬十月壬子以撫軍司馬王玄載為梁南秦
二州刺史癸酉割南兗州之鍾離豫州之馬頭又分秦郡梁郡歷
陽置新昌郡立徐州十一月丙子以散騎常侍垣閔為徐州刺史
丁丑尚書令袁粲母喪去職十二月癸卯朔日有蝕之乙巳司空
江州刺史桂陽王休範進位太尉尚書令袁粲還攝本任加號衛
將軍癸亥立前建安王世子伯融為始安縣王丙寅河南王遣使
獻方物

二年春正月庚子以右光祿大夫張永為征北將軍南兗州刺史
二月己巳加護軍將軍褚淵中軍將軍三月癸酉以左衛將軍王
寬為南豫州刺史夏四月癸亥詔曰頃列爵叙勳銓榮酬義條流
積廣又各淹闕歲往事留理至連壅在所參差多違甄飭賞未均
洽每疚厥心可悉依舊准並下注職五月壬子太尉江州刺史桂

張永為征北將軍南兗州刺史
二月己巳加護軍將軍褚淵中軍將軍
三月癸酉以左衛將軍王寬為南豫州刺史
夏四月癸亥詔曰頃列爵叙勳銓榮酬義條流積廣又各淹闕歲往事留理至連壅在所參差多違甄飭賞未均洽每疚厥心可悉依舊准並下注職五月壬子太尉江州刺史桂

陽王休範舉兵反庚寅內外戒嚴加中領軍劉劭鎮軍將軍加右
衛將軍齊王平南將軍前鋒南討出屯新亭征北將軍張永屯白
下前南兗州刺史沈懷明戍石頭衛將軍袁粲中軍將軍褚淵入
衛殿省壬辰賊奄至攻新亭壘齊王拒擊大破之越騎校尉張敬
兒斬休範賊黨杜黑蠡丁文豪分軍向朱雀航劉劭拒賊敗績力
戰死之右軍將軍王道隆奔走遇害張永潰於白下沈懷明自石
頭奔散戊午撫軍典籤茅恬開東府納賊賊入屯中堂羽林監陳
顯達擊大破之丙申張敬兒等破賊於宜陽門莊嚴寺小市進平
東府城梟擒羣賊賞賜封爵各有差丁酉詔京邑二縣埋藏所殺
賊并戰亡者復同京城是日解嚴大赦天下文武賜位一等戊戌
原除江州逋債其有課非常調役為民蠹者悉皆蠲停詔曰頃國
賦多騫公儲罕給近治戎雖淺而軍費已多廩藏虛罄難用馭遠

宜矯革淫長務在節儉其供奉服御悉就減撤雕文靡麗廢而勿修凡諸游費一皆禁斷外可詳爲科格荆州刺史沈攸之南徐州刺史建平王景素郢州刺史晉熙王燮湘州刺史王僧虔雍州刺史張興世並舉義兵赴京師己亥以第七皇弟友爲江州刺史芮芮國遣使獻方物六月庚子以南平將軍齊王爲中領軍鎮軍將軍南兖州刺史癸卯晉熙王燮遣軍尅尋陽江州平戊申以淮南太守任農夫爲豫州刺史右將軍南豫州刺史王寬進號平西將軍壬戌改輔師將軍還爲輔國秋七月庚辰立第七皇弟友爲邵陵王辛巳以輔軍司馬孟次陽爲兖州刺史乙酉鎮西將軍荆州刺史沈攸之進號征西大將軍鎮北將軍徐州刺史建平王景素進號征北將軍並開府儀同三司征虜將軍郢州刺史晉熙王燮進號安西將軍前將軍湘州刺史王僧虔進號平南將軍八月辛

酉以征虜行參軍劉延祖爲寧州刺史九月壬辰以游擊將軍呂安國爲兖州刺史丁酉以尚書令新除衛將軍袁粲爲中書監卽本號開府儀同三司領司徒加護軍將軍褚淵尚書令撫軍將軍揚州刺史安成王進號車騎將軍冬十月庚申以新除侍中王蘊爲湘州刺史甲子以遊擊將軍陳顯達爲廣州刺史十一月丙戌御加元服大赦天下賜民男子爵一級爲父後及三老孝悌力田者爵二級鰥寡孤獨篤癯不能自存者穀五斛年八十以上加帛一匹大酺五日賜王公以下各有差十二月癸亥立第八皇弟躋爲江夏王第九皇弟贇爲武陵王

三年春正月辛巳車駕親祠南郊明堂三月丙寅河南王遣使獻方物己巳以車騎將軍張敬兒爲雍州刺史其日京師大水遣尚書郎官長檢行賑賜閏月戊戌詔曰頃民俗滋弊國度未殷歲時

屢騫編戶不給且邊虞尚警徭費彌繁永言夕惕寢興增疚思弘
豐耗之制以惇約素之風庶侍蓄拯民以康治道大官珍膳御府
麗服諸所供擬一皆減撤可詳爲其格務從簡衷夏四月遣尚書
郎到諸州檢括民戶窮老尤貧者蠲除課調丁壯猶有生業隨宜
寬申貲財足以克限者督令洗畢丙戌車駕幸中堂聽訟六月癸
未北國使至兼司徒表粲尚書令褚淵竝固讓秋七月庚戌以粲
爲尚書令壬戌以給事黃門侍郎劉懷珍爲豫州刺史八月庚子
加護軍將軍褚淵中書監九月丙辰征西大將軍河南王吐谷渾
拾寅進號車騎大將軍冬十月丙戌高麗國遣使獻方物十二月
乙丑以冠軍將軍姚道和爲司州刺史

四年春正月己亥車駕躬耕籍田大赦天下賜力田爵一級貧
民糧種壬子以梁南秦二州刺史王玄載爲益州刺史二月壬戌
以步兵校尉范楫年爲梁南秦二州刺史丁卯加金紫光祿大夫
王琨特進夏五月以寧朔將軍武都王楊文度爲北秦州刺史乙
未尚書右丞虞玩之表陳時事曰天府虛散垂三十年江荆諸州
稅調本少自頃以來軍募多乏其穀帛所入折供文武豫竟司徐
開口待哺西北戎將裸身求衣委輸京都蓋爲寡薄天府所資唯
有淮海民荒財單不及曩日而國度引費四倍元嘉二衛臺坊人
力五不餘一都水材官朽散十不兩存備豫都庫材竹俱盡東西
二塢塼瓦雙匱敕令給賜悉仰交市尚書省舍日就傾頽第宅府
署類多穿毀視不遑救知不暇及尋所入定調用恒不周旣無儲
畜理至空盡積弊累耗鍾於今日昔歲奉敕課以揚徐衆逋凡入
米穀六十萬斛錢五千餘萬布絹五萬匹雜物在外賴此相贍故
得推移卽今所懸轉多興用漸廣深懼供奉頓闕軍器輟功將士

饑怨百官騫祿署府謝雕麗之器土木停緹紫之容國戚無以贍
敷求無以給如愚管所慮不月則歲矣經國遠謀臣所不敢言朝
夕祇勤心存於匪懈起伏震遽事屬肩聞伏願陛下留須臾之鑒
垂永代之計發不世之詔施必行之典則氓祇齊懽高卑同泰帝
優詔答之庚戌以驍騎將軍曹欣之為徐州刺史六月乙亥加鎮
軍將軍齊王尚書左僕射秋七月戊子征北將軍南徐州刺史建
平王景素據京城反巳丑內外纂嚴遣驍騎將軍任農夫領軍將
軍黃回北討鎮軍將軍齊王摠統眾軍曲赦南徐州始安王伯融
都鄉侯伯猷賜死辛卯豫州刺史殿佛榮統前鋒馬步眾軍甲午
軍主左軍將軍張保戰敗見殺黃回等至京城與景素諸軍戰連
破之乙未尅京城斬景素同逆皆伏誅其日解嚴丙申大赦天下
封賞各有差原京邑二縣元年以前逋調辛丑以武陵王贊為南

景素傳作
南徐州刺史
殿佛榮指
信改

徐州刺史八月丁卯立第十皇弟翽為南陽王第十一皇弟嵩為
新興王第十二皇弟禧為始建王庚午以給事黃門侍郎阮佃夫
為南豫州刺史乙酉以行青冀二州刺史劉善明為青冀二州刺
史九月丁亥割郢州之隨郡屬司州戊子驍騎將軍高道慶有罪
賜死巳丑車騎將軍揚州刺史安成王進號驃騎大將軍開府儀
同三司安西將軍郢州刺史晉熙王燮進號征西將軍冬十月辛
酉以吏部尚書王僧虔為尚書右僕射宕昌王梁彌機為安西將
軍河涼二州刺史丙寅中書監護軍將軍褚淵母憂去職十一月
庚戌詔攝本任

五年春二月壬申以建寧太守柳和為寧州刺史四月甲戌豫州
刺史阮佃夫步兵校尉申伯宗朱幼謀廢立佃夫幼下獄死伯宗
伏誅五月巳亥以左軍將軍沈景德為交州刺史驃騎將軍全景

文爲南豫州刺史丙午以屯騎校尉孫曇瓘爲越州刺史六月甲戌誅司徒左長史沈勃散騎常侍杜幼文游擊將軍孫超之長水校尉杜叔文大赦天下七月戊子夜帝殞於仁壽殿時年十五巳丑皇太后令曰衛將軍領軍中書監八座昱以冢嫡嗣登皇統庶其體識日弘社稷有寄豈意窮凶極悖自幼而長善無細而不違惡有大而必蹈前後訓誘常加隱蔽險戾難移日月滋甚棄冠毀冕長襲戎衣犬馬是狎鷹隼是愛皂歷軒殿之中鞬縶宸扆之側至乃單騎遠郊獨宿深野手揮矛鋌躬行剝削白刃爲弄器斬害爲恒務捨交戟之衛委天畢之儀趨步闌闐酣歌鑪肆宵遊忘返宴寢營舍奪人子女掠人財物方筭所不書振古所未聞沈勃儒士孫超功臣幼文兄弟並豫勲效四人無罪一朝同戮飛鏃鼓劔孩稚無遺屠裂肝腸以爲戲謔投骸江流以爲歡笑又淫費無度

帑藏空竭橫賦關河專克別蓄黔首嗷嗷厝生無所吾與其所生每厲以義方遂謀醜毒將騁凶忿沈憂假日慮不終朝自昔辛癸爰及幽厲方之於此未譬萬分民怨旣深神怒已積七廟沾危四海褫氣廢昏立明前代令範況廼滅義反道天人所棄豐深牧野理絕桐宮故密令蕭領軍潛運明略幽顯協規普天同泰驃騎大將軍安成王體自太宗天挺淹叡風神凝遠德映在田地隆親茂皇曆攸歸億兆係心含生屬望宜光奉祖宗臨享萬國便依舊典以時奉行未亡人追往傷懷永言感絕太后又令曰昱窮凶極暴自取灰滅雖曰罪招能無傷悼棄同品庶顧所不忍可特追封蒼梧郡王葬丹陽秣陵縣郊壇西初昱在東宮年五六歲時始就書學而情業好嬉戲主師不能禁好緣漆帳竿去地丈餘如此者半食久乃下年漸長喜怒乖節左右有失旨者輒手加撲打徒跣蹲

踞以此爲常主師以白太宗上輒敕昱所生嚴加捶訓及嗣位內
畏太后外憚諸大臣猶未得肆志自加元服變態轉興內外稍無
以制三年秋冬間便好出遊行太妃每乘青篋車隨相檢攝昱漸
自放恣太妃不復能禁單將左右棄部伍或十里二十里或入市
里或往營署日暮乃歸四年春夏此行彌數自京城尅定意志轉
驕於是無日不出與左右人解僧智張五兒恒相馳逐夜出開承
明門夕去晨返晨出暮歸從者並執鋌矛行人男女及犬馬牛驢
值無免者民間擾懼晝日不敢開門道上行人殆絕常著小袴褶
未嘗服衣冠或有忤意輒加以虐刑有白楛數十枚各有名號鍼
錐鑿鋸之徒不離左右嘗以鐵椎椎人陰破左右人見之有斂眉
者昱大怒令此人袒胛正立以矛刺胛洞過於耀靈殿上養驢數
十頭所自乘馬養於御牀側先是民間訛言謂太宗不男陳太妃

本李道兒妾道路之言或云道兒子也昱每出入去來常自稱勳

后妃傳作
李悅

統或自號李將軍與右衛翼輦營女子私通每從之遊持數千錢
供酒肉之費阮佃夫心腹人張羊爲佃夫所委信佃夫敗叛走後
捕得昱自於承明門以車轆殺之杜延載沈勃杜幼文孫超皆躬
運矛鋌手自彎割執幼文兄叔文於玄武湖北昱馳馬執稍自往
刺之制露車一乘其上施蓬乘以出入從者不過數十人羽儀追
之恒不及又各慮禍亦不敢追尋唯整部伍別在一處瞻望而已
凡諸鄙事過目則能鍛鍊金銀裁衣作帽莫不精絕未嘗吹篳執
管便韻天性好殺以此爲歡一日無事輒慘慘不樂內外百司人
不自保殿省憂遑夕不及旦齊王順天入之心潛圖廢立與直閣
將軍王敬則謀之七月七日昱乘露車從二百許人無復鹵簿羽
儀往青園尼寺晚至新安寺就曇度道人飲酒醉夕扶還於仁壽

道史從竹

殿東阿氈幄中臥時昱出入無恒省内諸閣夜皆不閉且羣下畏相逢值無敢出者宿衛並逃避內外無相禁攝王敬則先結昱左右楊玉夫楊萬年呂欣之湯成之陳奉伯張石留羅僧智鍾千載嚴道福雷道賜戴昭祖許啟戚元寶盛道泰鍾千秋王天寶公上延孫俞成錢道寶馬敬之陳寶直吳璵之劉印魯唐天寶俞孫等二十五人謀共取昱其夕敬則出外玉夫見昱醉熟無所知乃與萬年同入氈幄內以昱防身刀斬之奉伯提昱首依常行法稱敕開承明門出以首與敬則馳至領軍府以首呈齊王王乃戎服率左右數十人稱行還開承明門入昱他夕每開門門者震懾不敢視至是弗之疑齊王既入曉乃奉太后令奉迎安成王

史臣曰喪國亡家之王雖適末同途發軔或異也前廢帝卑遊藝幸皆龍駕帝飾傳警清路蒼梧王則藏璽懷紱魚服忘反危冠短服匹馬孤征至於殞身覆祚其理若一姬夏之隆質文異尚亡國之道其亦然乎

宋書卷九 本紀第九終

魏書卷九

宋書卷十

魏書卷十

本紀第十

順帝

順皇帝諱準字仲謀小字智觀明帝第三子也泰始五年七月癸丑生七年封安成王食邑三千戶仍拜撫軍將軍置佐史廢帝即位為揚州刺史元徽二年進號車騎將軍都督揚南豫二州諸軍事給鼓吹一部刺史如故四年又進號驃騎大將軍開府儀同三司班劍三十人都督刺史如故元徽五年七月戊子夜廢帝殞奉迎王入居朝堂壬辰即皇帝位昇明元年改元大赦天下賜文武位二等甲午鎮軍將軍齊王出鎮東城輔政作相丙申詔曰露臺息構義光漢德雉裘焚制事隆晉道故以檢奢軌化敦儉馭俗頃旬服未靜師旅連年委蓄屢空勞蔽莫偃而丹雘之飾糜耗難訾

寶賂之費徵賦靡計今車服儀制寔宜約損使徽章有序勿得侈
溢可罷省御府二署凡工麗雕鐫傷風毀治一皆禁斷庶永昭憲
則弘茲始政征西大將軍荊州刺史沈攸之進號車騎大將軍開
府儀同三司尚書左僕射中領軍鎮軍將軍南兗州刺史齊王爲
司空錄尚書事驃騎大將軍刺史如故中書令衛將軍開府儀同
三司撫軍將軍劉秉爲尚書令加中軍將軍安西將軍郢州刺史
晉熙王燮爲撫軍將軍揚州刺史南陽王翊爲郢州刺史辛丑尚
書右僕射王僧虔爲尚書僕射右衛將軍劉韞爲中領軍金紫光
祿大夫王琨爲右光祿大夫給司空齊王錢五百萬布五千匹癸
卯車駕謁太廟丙午以安西參軍明慶符爲青冀二州刺史武陵
王贊爲郢州刺史新除郢州刺史南陽王翊爲湘州刺史司空南
兗州刺史齊王改領南徐州刺史征虜將軍李安民爲南兗州刺

史雒州大水八月壬子遣使賑卹蠲除稅調以驃騎長史劉澄之
爲南豫州刺史山陽太守于天寶新吳縣于秦立有辜下獄死戊
午改平準署辛酉以宣城太守李靈謙爲兗州刺史癸亥司空袁
粲鎮石頭丁卯原除元年以前逋調復郡縣祿田戊辰崇拜帝所
生陳昭華爲皇太妃庚午司空長史謝朓衛軍長史江敷中書侍
郎褚炫武陵王文學劉侯入直殿省參侍文義齊王固讓司空庚
辰以爲驃騎大將軍開府儀同三司九月己丑詔曰昔聖王旣沒
淳風已衰龜書永湮龍圖長秘故三代之末德刑相擾世淪物競
道陂人諛然猶正士比轂奇才接軫朕襲運金樞纂靈瑤極負晨
巡政日晏忘疲永言興替望古盈慮姬夏典載猶傳緗帙漢魏餘
文布在方冊故元封興茂才之制地節朔獨行之品振維務本存
乎得人今可宣下州郡搜揚幽仄標采鄉邑隨名薦上朕將親覽

朱明鑑云化中載
者沈諸人或云據
地以反或云有罪
伏誅夫蕭道成
之心跡人所知也沈
司德劉宋素不忌
宗室投袂而起
劉遐王宜興王面
輩心術執政政與
異同即忠貞之跡
少讓素沈亦高
出諸淵而休又
概加反名坐以罪
狀抑何善作詔
大也替周大倫
是非舛戾亦章
贖罪自悔何晚
嘗讀南史順帝
紀表沈諸人類
有書法在彼之

則曰舉兵不從
執政黎則曰據
石頭謀誅道成
在遐宜興及劉
曰不從執政或
曰貳于執政文
盡不汙彷彿南
董考亭字儒目
備其意而不改
代良史吾推
延壽為才矣

甄其茂異庶野無遺彥永激遐芬巳酉廬陵王高薨冬十一月巳酉倭國遣使獻方物丙午員外散騎侍郎胡羨生行越州刺史以交州刺史沈景德為廣州刺史十二月丁巳以驍騎將軍王廣之為徐州刺史車騎大將軍荊州刺史沈攸之舉兵反丁卯錄公齊王入守朝堂侍中蕭疑鎮東府戊辰內外纂嚴巳巳以郢州刺史武陵王贊為安西將軍荊州刺史征虜將軍雒州刺史張敬兒進號鎮軍將軍右衛將軍黃回為平西將軍郢州刺史督諸軍前鋒南討征虜將軍呂安國為湘州刺史都官尚書王寬加平西將軍庚午新除左衛將軍齊王世子奉新除撫軍將軍揚州刺史晉熙王燮鎮尋陽之益城壬申以驍騎將軍周槃龍為廣州刺史是日司徒劾黎據石頭反尚書令劉秉黃門侍郎劉述冠軍王濞率眾赴之黃回及輔國將軍孫曇瓘屯騎校尉王宜興輔國將軍任倅

伯左軍將軍彭文之密相響應中領軍劉韞直閣將軍卜伯興在殿內同謀錄公齊王誅韞等於省內軍王蘇烈王天生薛道淵戴僧靜等陷石頭斬黎於城內秉述蒞踰城走追擒之並伏誅其餘無所問豫州刺史劉懷珍雒州刺史張敬兒廣州刺史陳顯達並舉義兵司州刺史姚道和梁州刺史范栢年湘州行事庾佩玉擁眾懷貳甲戌大赦天下乙亥以尚書僕射王僧虔為尚書左僕射新除中書令王延之為尚書右僕射吳郡太守劉遐據郡反輔國將軍張瓌討斬之閏月辛巳屯騎校尉王宜興有辜伏誅癸巳沈攸之攻圍郢城前軍長史柳世隆固守攸之弟登之作亂於吳興吳興太守沈文秀討秀討善斬之巳亥內外戒嚴假錄公齊王黃鉞辛丑寧朔將軍北秦州刺史武都王楊文慶進號征西將軍乙巳錄公齊王出頓新亭

二年春正月沈攸之遣將公孫方平據西陽辛酉建寧太守張謨擊破之丁卯沈攸之自郢城奔散己巳華容縣民斬送之左將軍豫州刺史劉懷珍進號平南將軍辛未鎮軍將軍雒州刺史張敬兒克江陵斬攸之子光琰荆州平同逆皆伏誅丙子解嚴以新除侍中柳世隆爲尚書右僕射是日錄公齊王旋鎮東府丁丑以江州刺史邵陵王友爲安南將軍豫州刺史左衛將軍齊王世子爲江州刺史侍中蕭巖爲領軍鎮軍將軍雒州刺史張敬兒進號征西將軍平西將軍郢州刺史黃回進號鎮西將軍二月庚辰以尚書左僕射王僧虔爲尚書令尚書右僕射王延之爲尚書左僕射癸未錄公齊王加授太尉衛將軍褚淵爲中書監司空甲申曲赦荆州丙戌撫軍將軍揚州刺史晉熙王燮進號中軍將軍開府儀同三司戊子蠲雒州緣沔居民前被水災者租布三年辛卯郢州

銘按三年
子衍文

刺史新除鎮南將軍黃回爲鎮北將軍南兖州刺史南兖州刺史李安民爲郢州刺史癸巳以山陰令傅琰爲益州刺史丙申左軍將軍彭文之有擧下獄死行湘州事任侯伯殺前湘州行事庾佩玉傳首京邑三月庚戌以廣州刺史周槃龍爲司州刺史輔國將軍劉俊爲廣州刺史丙子給太尉齊王羽葆鼓吹夏四月己卯以游擊將軍垣崇祖爲兖州刺史辛卯新除鎮北將軍南兖州刺史黃回有擧賜死甲午輔國將軍淮南宣城二郡太守蕭映行南兖州刺史五月戊午倭國王武遣使獻方物以武爲安東大將軍輔國將軍行湘州事任侯伯有擧伏誅六月己丑以前新會太守趙超民爲交州刺史丁酉以輔國將軍楊文弘爲北秦州刺史武都王八月辛卯太尉齊王表斷奇飾麗服凡十有四條乙未以江州刺史齊王世子爲領軍將軍撫軍將軍丙申以領軍蕭巖爲江州

刺史九月乙巳朔日有蝕之丙午加太尉齊王黃鉞都督中外諸軍事太傅領揚州牧劔履上殿入朝不趨贊拜不名置左右長史司馬從事中郎掾屬各四人中軍將軍揚州刺史晉熙王燮爲司徒戊申行南兗州刺史蕭映爲南兗州刺史甲寅給太傅齊王三望車已未芮芮國遣使獻方物癸酉武陵內史張澹有臯下獄死冬十月丁丑寧朔將軍淮南宣城二郡太守蕭晃爲豫州刺史孫曇瓘先逃亡巳卯擒獲伏誅壬寅立皇后謝氏減死臯一等五歲刑以下悉原十二月壬子立故武昌太守劉琨息頌爲南豐縣王癸亥臨澧侯劉晃謀反晃及黨與皆伏誅甲子改封南陽王翽爲隨郡王改隨陽郡十二月丙戌皇后見于太廟戊子高麗國遣使獻方物

三年春正月甲辰以江州刺史蕭疑爲鎮西將軍荊州刺史尚書

左僕射王延之爲安南將軍江州刺史安西長史蕭順之爲郢州刺史乙卯太傅齊王表諸負官物質役者悉原除辛亥以驍騎將軍王玄邈爲梁南秦二州刺史領軍將軍撫軍將軍齊王世子加尚書僕射進號中軍大將軍開府儀同三司丙辰加太傅齊王前部羽葆鼓吹丁巳詔太傅府依舊辟召以征西將軍雒州刺史張敬兒爲護軍將軍新除給事黃門侍郎蕭諱爲雒州刺史二月丙子安南將軍南豫州刺史邵陵王友薨三月癸卯朔日有蝕之甲辰崇太傅爲相國總百揆封十郡爲齊公備九錫之禮加璽紱遠遊冠位在諸王上加相國綠綬綬其驃騎大將軍揚州牧南徐州刺史如故丙午以中軍大將軍諱爲南豫州刺史齊公世子副貳相國綠綬綬庚戌臨川王綽謀反綽及黨與皆伏誅丁巳以齊國初建給錢五百萬布五千匹絹千匹夏四月壬申進齊公爵爲齊

王增封十郡甲戌安西將軍武陵王贊薨丙辰命齊王冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鍾簾宮縣進世子為太子王子王女王孫爵命之號壹如舊儀辛卯天祿永終禪位於齊壬辰帝遜位於東郊既而遷居丹陽宮齊王踐阼封帝為汝陰王待以不臣之禮行宋正朔上書不為表答表不為詔建元元年五月己未徂于丹陽宮時年十三謚曰順帝六月乙酉葬于遂寧陵

史臣曰聖王膺錄自非接亂承微則天曆不至也自三五以來受命之主莫不乘淪亡之極然後符樂推之運水德遷謝其來久矣豈止於區區汝陰揖禪而已哉

陳允錫云魏篡漢晉篡魏待舊君犹有禮劉宏獨行弑逆固宜其有山

宋書卷十 本紀第十 終十六日勅此四卷

五山堂藏書
氏閣印

宋書卷十一

五山堂藏書
氏閣印

志第一

宋書十一

律志序

左史記言右史記事春秋是也言則尚書是也至於楚書鄭志晉乘楚杙之篇皆所以照述前史俾不泯於後司馬遷制一家之言始區別名題至乎禮儀刑政有所不盡乃於紀傳之外剏立八書片文隻事鴻纖備舉班氏因之靡違前式網羅一代條流遂廣律曆禮樂其名不變以天官為天文改封禪為郊祀易貨殖平準之稱革河渠溝洫之名綴孫卿之辭以述刑法采孟軻之書用序食貨劉向洪範始自春秋劉歆七略儒墨異部朱贛博采風謠尤為詳洽固並因仍以為三誌而禮樂疏簡所漏者多典章事數百不記一天文雖為該舉而不言天形致使三天之說紛然莫辨

朱明篇云書漢名而稱事上蓋犧年志當宗而後引送取鳥紀史通之議已責班氏移之相優休文何辭張光味準嚴宣律已入范書杜慶辨鍾此宋王養馬先形陳志前易列和往復之辭劉秀吳造留之刑時晉無書應成別錄連續紀載乃辭費鍾宗初減箱苗吳能維損寸分元嘉樂制事止之存志實亦數詞而已

是故蔡邕於朔方上書謂宜載述者也。漢興接秦坑儒之後，典墳殘缺者，生碩老常以亡逸爲慮。劉歆七略固之，藝文蓋爲此也。河自龍門東注，橫被中國，每漂決所漸，寄重災深堤築之功，勞役天下，且關洛高塏，地少川源，是故鎬鄠潦滴，咸入禮典。漳滏鄭白之饒，溝渠沾漑之利，皆民命所祖國以爲天。溝洫立志，亦其宜也。世殊事改，於今可得而略竊以班氏律曆前事已詳，自楊偉改創景初而魏書闕志，及元嘉重造新法，大明博議回改，自魏至宋，宜入今書。班固禮樂郊祀馬彪祭祀禮儀，蔡邕朝會董巴輿服，並各立志。夫禮之所苞，其用非一。郊祭朝饗，匪云別事，旗章服物，非禮而何。今總而裁之，同謂禮志。刑法食貨前說已該，隨流派別附之。紀傳樂經殘缺，其來已遠。班氏所述政抄舉樂記，馬彪後書又不備續。至於八音衆器，並不見書，雖略見世本，所闕猶衆。爰及雅鄭謳

謠之節，一皆屏落，曾無槩見。郊廟樂章，每隨世改，雅聲舊典，咸有遺文。又案今鼓吹鏡歌，雖有章曲，樂人傳習，口相師祖，所務者聲不先訓，以義今樂府鏡歌，校漢魏舊曲，曲名時同，文字永異。尋文求義，無一可了。不知今之鏡章，何代曲也。今志自郊廟以下，凡諸樂章，非淫哇之辭，並皆詳載。天文五行，自馬彪以後，無復記錄。何書自黃初之始，徐志肇義熙之元，今以魏接漢式，遵何氏然則自漢高帝五年之首冬，暨宋順帝昇明二年之孟夏，二辰六沴，甲子無差。聖帝哲王，咸有瑞命之紀，蓋所以神明寶位，幽贊禎符，欲使逐鹿弭謀，窺覬不作，握河括地，綠文赤字之書，言之詳矣。爰逮道至天而甘露下，德洞地而醴泉出，金芝玄柜之祥，朱艸白鳥之瑞，斯固不可誣也。若夫衰世德爽而嘉應不息，斯固天道茫昧，難以數推，亦由明主居上而震蝕之災不弭，百靈咸順而懸象之應獨

此段議於
與州郡志
極有闕焉

違今立符瑞志以補前史之闕地理參差事難該辨魏晉以來遷徙百計一郡分爲四五一縣割成兩三或昨屬荆豫今隸司兗朝爲零桂之士夕爲廬九之民去來紛擾無暫止息版籍爲之渾淆職方所以不能記自戎狄內侮有晉東遷中土遺氓播徙江外幽并冀雖兗豫青徐之境幽淪寇逆自扶莫而裹足奉首免身於荆越者百郡千城流寓比室人佇鴻鴈之歌士蓄懷本之念莫不各樹邦邑思復舊井旣而民單戶約不可獨建故魏邦而有韓邑齊縣而有趙民且省置交加日回月徙寄寓遷流迄無定託邦名邑號難或詳書大宋受命重啓邊隙淮北五州翦爲寇境其或奔亡播遷復立郡縣斯則元嘉泰始同名異實今以班固馬彪二志晉宋起居凡諸記注悉加推討隨條辨析使悉該詳百官置省備有前譏尋源討流於事爲易元嘉中東海何承天受詔纂宋書其志

十五篇以續馬彪漢志其證引該博者卽而因之亦由班固馬遷共爲一家者也其有漏闕及何氏後事備加搜采隨就補綴焉淵流浩漫非孤學所盡足蹇途遙豈短策能雖斟酌前史備覩妍媸而愛嗜異情取捨殊意每含毫握簡杼軸忘飡終亦不足與班左並馳董南齊轡庶爲後之君子削藁而已焉

黃帝使伶倫自大夏之西阮隃之陰取竹之嶰谷生其竅厚均者斷兩節間而吹之以爲黃鍾之宮制十二管以聽鳳鳴以定律呂夫聲有清濁故協以宮商形有長短故檢以丈尺器有大小故定以斛斗質有輕重故平以鈞石故虞書曰乃同律度量衡然則律呂官商之所由生也夫樂有器有文有情有官鍾鼓干戚樂之器也屈伸舒疾樂之文也論倫無患樂之情也欣喜歡愛樂之官也是以君子反情以和志廣樂以成教故能情深而文明氣盛而化

神和順積中而英華發外故曰樂者心之動也聲者樂之象也周禮曰乃奏黃鍾歌大呂舞雲門以祀天神乃奏太簇歌應鍾舞咸池以祭地祇四望闕山川先祖各有其樂又曰圜鍾為宮黃鍾為徵姑洗為羽雷鼓雷鼗孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣地祇人鬼禮亦如之其可以感物興化若此之深也道始於一一生二二生三三而九故黃鍾之數六分而為雌雄十二鍾鐘以三成故置一而三之凡積分十七萬七千一百四十七為黃鍾之實故黃鍾位子主十一月下生林鐘林鐘之數五十四主六月上生太簇太簇之數七十二主正月下生南呂南呂之數四十八主八月上生姑洗姑洗之數六十四主三月下生應鍾應鍾之數四十三主十月上生蕤賓蕤賓之數五十七主五月上生大呂大呂之數七十

六主十二月下生夷則夷則之數五十主七月上生夾鐘夾鐘之數六十七主二月下生無射無射之數四十五主九月上生中呂中呂之數六十主四月極不生極不生鐘律不能復相生宮生徵徵生商商生羽羽生角角生姑洗姑洗生應鍾不比於正音故為和姑洗三月應鍾十月不與正音比效應鍾生蕤賓蕤賓不比於正音故為繆繆音相干也周律故有繆和為武王伐紂七音也冬至音比林鍾浸以濁日夏至音比黃鍾浸以清以十二月律應二十四時甲子中呂之徵也丙子夾鐘之羽也戊子黃鍾之宮也庚子無射之商也壬子夷則之角也古人為度量輕重皆生乎天道黃鍾之律長九寸物以三生三三九三九二十七故幅廣二尺七寸古之制也音以八相生故人長八尺尋自倍故八尺而為尋有形即有聲音之數五以五乘八五八四十四尺為匹匹者中人之度也一匹為制秋分而禾稌定稌禾穗芒也標定而禾孰律之數十二故

陳云自倍反至八而為尋

十二標而當一粟一粟而當一寸律以當辰音以當日日之數十
故十寸而為尺十尺為丈其以為重十二粟而當一分十二分而
當一銖十二銖而當半兩衡有左右因而倍之故二十四銖而當
一兩天有四時以成一歲因而四之四四十六故十六兩而一斤
三月而一時三十日一月故三十斤而為一鈞四時而一歲故四
鈞而一石其為音也一律而生五音十二律而為六十音因而六
之六六三十六故三百六十音以當一歲之日故律曆之數天地
之道也下生者倍以三除之上生者四以三除之揚子雲曰聲生
於日謂甲巳為角乙庚為商丙辛為徵丁壬為羽戊癸為宮律生於辰謂子為黃鐘丑為大呂之屬聲以情質質正也各以其行本情為正也
律以和聲當以律管鍾均和其清濁之聲聲律相協而八音生和協官商角徵羽謂之五
聲金石匏革絲竹土木謂之八音聲和音諧是謂五樂夫陰陽和
則景至律氣應則灰除是故天子常以冬夏至御前殿合八能之

士陳八音聽樂均度晷景候鍾律權土炭效陰陽冬至陽氣應則
樂均清景長極黃鐘通土炭輕而衡却夏至陰氣應則樂均濁景
短極蕤賓通土炭重而衡低進退於先後五日之中八能各以候
狀聞太史令封上効則和否則占候氣之法為室三重戶閉塗爨
周密布緹幔室中以木為案每律各一內庫外高從其方位加律
其上以葭葦灰布其內端案曆而候之氣至者次去散人及風所
動者其灰聚殿中候用玉律十二唯二至乃候取弘農宜陽縣金
門山竹為灰三代陵遲音律失度漢興北平侯張蒼始定律曆孝
武之世置協律之官元帝時郎中京房知五音六十律之數受學
於小黃令焦延壽其下生上生終於中呂而十二律畢矣中呂上
生執始執始下生去滅終於南事而六十律畢矣夫十二律之變
至於六十猶八卦之變至於六十四也必義作易紀陽氣之初以

為律法建日冬至之聲以黃鐘為宮太簇為商姑洗為角林鍾為徵南呂為羽應鍾為變宮蕤賓為變徵此聲氣之元五音之正也故各統一日其餘以次運行當日者各自為宮而商角徵羽以類從焉禮運篇曰五聲六律十二管還相為宮此之謂也以六十律分一朞之日黃鐘自冬至始及冬至而復陰陽寒煖風雨之占於是生焉房又曰竹聲不可以度調故作準以定數準之狀如瑟長丈而十三弦隱間九尺以應黃鐘之律九寸中央一弦下有畫分寸以為六十律清濁之節房言律詳其術施行於史官候部用之續漢志具載其律準度數

漢章帝元和元年待詔候鐘律殷彤上言官無曉六十律以準調音者故待詔嚴嵩具以準法教子男宣願召宣補學官主調樂器詔曰嵩子學審曉律別其族協其聲者審試不得依託父學以聾為聰聲微妙獨非莫知獨是莫曉以律錯吹能知命十二律不失一乃為能傳嵩學耳試宣十二律其中其二不中其四不中其六不知何律宣遂罷自此律家莫能為準靈帝熹平六年東觀召典律者太子舍人張光等問準意光等不知歸閱舊藏乃得其器形制如房書猶不能定其絃緩急音不可以書曉人知之者欲教而無從心達者體知而無師故史官能辨清濁者遂絕其可以相傳者唯候氣而已

舊律度	新律度	舊律分	新律分
黃鍾九寸	九寸	十七萬七千一	十七萬七千一百
林鍾六寸	六寸一釐	百四十七	四十七
		十一萬八千九	十一萬八千二百
		十八	九十六二十五

新律分
新律小分
十三十六

太簇八寸 八寸二釐 十五萬七千四 十五萬七千八百

南呂五寸二分 五寸三分六釐 十萬四千九百 十萬五千五百七

三釐少疆 七十六 十二三

姑洗七寸一分七寸一分五釐 十三萬九千九 十四萬七百六十

一釐少疆 百六十八 二二十八

應鍾四寸七 四寸七分九釐 九萬三千三百 九萬四千三百五

蕤賓六寸三分 六寸三分八釐 十二萬四千四 十二萬五千六八

二釐少疆 三十六 六

大呂八寸四分 八寸四分九釐 十六萬五千八 十六萬七千二百

二釐大疆 百八十八 七十八三十一

夷則五寸六分 五寸七分弱 十一萬五百九 十一萬二千一百

一釐大疆 十二 八十一二十

夾鍾七寸四分 七寸五分八釐 十四萬七千四 十四萬九千二百

九釐少疆 百五十六 四十四九

無射四寸九分 五寸九釐半 九萬八千三百 十萬二百九十三

九釐半疆 四 十四

中呂六寸六分 六寸七分七釐 十三萬一千七 十三萬三千二百

六釐弱 十二 五十七二十五

黃鍾八寸八分九寸 十七萬四千七 十七萬七千一百

八釐弱 百六十二 四十七

論曰律呂相生皆二分而損益之先儒推十二律從子至亥每三

三分之二分二千四
百八十四三分之一

之凡十七萬七千一百四十七而三約之是爲上生故漢志云三分損一下生林鍾三分益一上生太簇無射既上生中呂則中呂又當上生黃鍾然後五聲六律十二管還相爲宮今上生不及黃鍾實二千三百八十四九約實一千九百六十八爲一分此則不周九寸之律一分有奇豈得還爲宮乎凡三分益一爲上生三分損一爲下生此其大略猶周天斗分四分之一耳京房不思此意比十二律微有增方引而伸之中呂上生執始執始下生去滅至于南事爲六十律竟復不合彌益其疏氏所志未能通律呂本源徒訓角爲觸徵爲祉陽氣施種於黃鍾如斯之屬空煩其文而爲辭費又推九六欲符劉歆三統之數假託非類以飾其說皆孟堅之妄矣

蔡邕從朔方上書云前漢志但載十律不及六十六律尺寸相生

司馬彪皆已志之漢末亡失雅樂黃初中鑄玉柴玉巧有思想形器之中多所造作協律都尉杜夔令玉鑄鍾其聲清濁多不如法數毀改作玉甚厭之謂夔清濁任意更相訴白於魏王魏王取玉所鑄鍾雜錯更試然後知夔爲精於是罪玉及諸子皆爲養馬主晉太始十年中書監荀勗中書令張華出御府銅竹律二十五具部太樂郎劉秀等校試其三具與杜夔及左延年律法同其二十二具視其銘題尺寸是笛律也問協律中郎將列和辭昔魏明帝時令和承受笛聲以作此律欲使學者別居一坊歌詠講習依此律調至於都合樂時但識其尺寸之名則絲竹歌詠皆得均合歌聲濁者用長笛長律歌聲清者用短笛短律凡絃歌調張清濁之制不依笛尺寸名之則不可知也勗等奏昔先王之作樂也以振風蕩俗饗神佐賢必協律呂之和以節八音之用是故郊祀朝宴

陳云此不易之理

哥下同

用之有制歌奏分叙清濁有宜故曰五聲十二律還相爲宮此經傳記籍可得而知者也如和對辭笛之長短無所象則率意而作不由曲度考以正律皆不相應吹其聲均多不諧合又辭先師傳笛別其清濁直以長短工人裁制舊不依律是爲作笛無法而知寫笛造律又令琴瑟歌詠從之爲正非所以稽古先哲垂憲于後者也謹條牒諸律問和意狀如左及依典制用十二律造笛像十二枚聲均調和器用便利講肄彈擊必合律呂況乎宴饗萬國奏之廟堂者哉雖伶夔曠遠至音難精猶宜形古昔以求厥衷合于經禮於制爲詳若可施用請更部笛上選竹造作太樂樂府施行平議諸杜夔左延年律可皆留其御府笛正聲下徵各一具皆銘題作者姓名其餘無所施用還付御府毀奏可勗又問和作笛爲可依十二律作十二笛令一孔依一律然後乃以爲樂不和辭太

樂東廂長笛正聲已長四尺二寸令當復取其下徵之聲於法聲濁者笛當長計其尺寸乃五尺有餘和昔日作之不可吹也又笛諸孔雖不校試意謂不能得一孔輒應一律也案太樂四尺二寸當正聲均應蕤賓以十二律還相爲宮推法下徵之孔當應律大呂大呂笛長二尺六寸有奇不得長五尺餘令太樂郎劉秀鄧昊等依律作大呂笛以示和又吹七律一孔一校聲皆相應然後令郝生鼓箏宋同吹笛以爲雜引相和諸曲和乃辭曰自和父祖漢世以來笛家相傳不知此法而令調均與律相應實非所及也郝生魯基种整朱夏皆與和同又問和笛有六孔及其體中之空爲七和爲能盡各其宮商角徵不孔調與不調以何檢知和辭先師相傳吹笛但以作曲相語爲某曲當與某指初不知七孔盡應何聲也若當作笛其仰上方笛工依案舊像訖但吹取鳴者初不復

校其諸孔調與不調也案周禮調樂金石有一定之聲是故造鍾磬者先依律調之然後施於廂懸作樂之時諸音皆受鍾磬之均卽爲悉應律也至于饗宴殿堂之上無廂懸鍾磬以笛有一定調故諸絃歌皆從笛爲正是爲笛猶鍾磬宜必合於律呂如和所對直以意造率短一寸七孔聲均不知其皆應何律調與不調無以檢正唯取竹之鳴者爲無法制輒部郎劉秀鄧昊魏邵等與笛工參共作笛工人造其形律者定其聲然後器象有制音均和協又問和若不知律呂之義作樂音均高下清濁之調當以何名之和辭每合樂時隨歌者聲之清濁用笛有長短假令聲濁者用三尺二笛因名曰此三尺二調也聲清者用二尺九笛因名曰此二尺九調也漢魏相傳施行皆然案周禮奏六樂乃奏黃鍾歌大呂乃奏太簇歌應鍾皆以律呂之義紀歌奏清濁而和所稱以二尺

三尺爲名雖漢魏用之俗而不典部郎劉秀鄧昊等以律作笛三尺二寸者應無射之律若宜用長笛執樂者曰請奏無射周語曰無射所以宣布哲人之令德示民軌儀也二尺八寸四分四釐應黃鍾之律若宜用短笛執樂者曰請奏黃鍾周語曰黃鍾所以宣養六氣九德也是則歌奏之義當合經禮考之古典於制爲雅書曰予欲聞六律五聲八音在治忽始周禮載六律六同禮記又曰五聲十二律還相爲宮劉歆班固纂律曆志亦紀十二律唯京房始創六十律至章帝時其法已亡蔡邕雖追古作其言亦曰今無能爲者依案古典及今音家所用六十律者無施於樂謹依典記以五聲十二律還相爲宮之法制十二笛象記注圖側如別省圖不如視笛之了故復重作蕤賓伏孔笛其制云黃鍾之笛正聲應黃鍾下徵應林鍾長二尺八寸四分四釐有奇

周語曰黃鍾所以宣養六氣九德也至聲調法以黃

鍾為宮則姑洗為角翁笛之聲應姑洗故以四角正聲調法黃鍾為宮第一應鍾為

變宮第二南呂為羽第三林鍾為徵第四蕤賓為變徵第五姑洗為角第六笛體

太簇為商第七笛後出孔也商聲濁於角當在角下而角聲以在體中故上其商孔令在宮上清

上下大律之名也下章於宮也然則宮商正也餘聲皆倍也是故從宮以下孔轉下轉濁也此章說笛孔

說律呂相生笛之制也正聲調法黃鍾為宮作黃鍾之笛將求宮孔以姑洗及黃鍾律

也宮聲宮生徵黃鍾生林鍾也以林鍾之律從宮孔下度徵生商林鍾生太簇

也以太簇律從徵孔上度之商生羽太簇生南呂也以南呂律度從角孔下度羽生

角南呂生姑洗也以姑洗律從羽孔上行度之盡律而為孔則得角聲也然則出於商孔

聲出於附商孔之下則吹者右手所不逮也故不作角孔推而下之復倍其均是以角聲在笛中

古之制也音家舊法雖一部再倍但今均同適足為唱和之聲無害於曲均故也周語曰匏竹利制

議宜謂便於事用從宜者也角生變宮姑洗生應鍾也上句所謂當為角孔而出商下者墨點識之

之聲變宮生變徵應鍾生蕤賓也以蕤賓律從變宮下度之盡律為孔則得變徵之聲

使事用例下徵調法林鍾為宮第四孔也本正聲黃鍾之徵徵清當在宮上用笛之宜

皆一者也律還相為宮者然則正南呂為商第三孔本正聲黃鍾應鍾為角第二孔也本正聲黃

聲調清下徵調濁也

之角黃鍾為變徵下徵之調林鍾為宮大呂當變徵而黃鍾笛本無大呂之聲故假用黃

也黃鍾應濁而太簇清大呂律在二律之間俱發三孔而徵磴磳

之則得大呂變徵之聲矣諸笛下徵調求變徵之法皆如此太簇為徵笛後出孔本正聲

徵姑洗為羽笛體中翁聲也本正聲蕤賓為變宮附孔是也本正聲之變徵也今為下

轉濁下徵之調清角之調以姑洗為宮即是笛體中翁聲也於正聲為角於下徵為羽

孔轉上轉清也得為宛詩謠俗之蕤賓為商正林鍾為角非正南呂為變徵非正應鍾為徵

曲不合雅樂也正黃鍾為羽非正太簇為變宮非正也清角之調唯宮商及徵與律相應餘四聲凡

也正黃鍾為羽非正太簇為變宮非正也清角之調唯宮商及徵與律相應餘四聲凡

笛體用角律其長者八之鍾也短者四之其餘十笛空中實容長者

十六短笛竹宜受八律之黍也若長短大小不合於此或器用不便聲均法三宮一曰正聲

三曰度之齊等也然笛竹率上天下小不能均齊必不得已取其聲均合伏孔四所以便事用也一曰正角

者也二曰倍角近笛下者也三曰變宮近於宮孔倍令下者也四曰變徵遠於徵孔倍令高者也

或倍或半或四分一取則於琴徵也四者皆不作其孔而取其度以應進退上下之法所以協聲

均便事用也其本孔隱而不見故曰伏孔

大呂之笛正聲應大呂下徵應夷則長二尺六寸六分三釐有奇

周語曰元間大呂助宣物也

大簇之笛正聲應大簇下徵應南呂長二尺五寸三分一釐有奇

周語曰大簇所以金奏贊揚出滯也

夾鍾之笛正聲應夾鍾下徵應無射長二尺四寸周語曰二間夾鍾出四隙之細也

姑洗之笛正聲應姑洗下徵應應鍾長二尺二寸三分三釐有奇

周語曰三間中呂宮中氣也

蕤賓之笛正聲應蕤賓下徵應大呂長三尺九寸九分五釐有奇

周語曰蕤賓所以神人獻酬交酢變宮近孔故陪半今下用也林鍾亦如之

林鍾之笛正聲應林鍾下徵應大簇長三尺七寸九分七釐有奇

周語曰四間林鍾和展百事俾莫不任肅純恪

夷則之笛正聲應夷則下徵應夾鍾長三尺六寸周語曰夷則所以詠歌九州平民無貳也變宮之法亦如蕤賓體用四角故四分益一也

周語曰六間應鍾均利器用俾應復也

南呂之笛正聲應南呂下徵應姑洗長三尺三寸七分周語曰五間南呂贊陽秀也

無射之笛正聲應無射下徵應中呂長三尺二寸周語曰無射所以宣布哲人之令德示民軌儀也

應鍾之笛正聲應應鍾下徵應蕤賓長三尺九寸九分六釐有奇

周語曰六間應鍾均利器用俾應復也

勗又以魏杜夔所制律呂檢校太樂總章鼓吹八音與律乖錯始

知後漢至魏尺度漸長於古四分有餘夔依為律呂故致失韻及

部佐著作郎劉恭依周禮更積黍起度以鑄新律既成慕求古器

得周時玉律比之不差毫釐又漢世故鍾以律命之不叩而自應

初勗行道逢趙郡商人縣鐸於牛其聲甚韻至是授得此鐸以調

律呂焉

晉武帝以勗律與周漢器合乃施用之散騎侍郎阮咸譏其聲高

非與國之音咸亡後掘地得古銅尺果長勗尺四分時人咸服其

妙

元康中裴頠以為醫方民命之急而稱兩不與古同為害特重宜因此改治權衡不見省

黃鍾箱笛晉時三尺八寸元嘉九年太樂令鍾宗之減為三尺七

寸十四年治書令史奚縱又減五分為三尺六寸五分列和云東箱長

太簇箱笛晉時三尺七寸宗之減為三尺三寸七分縱又減一寸

一分為三尺二寸六分姑洗箱笛晉時三尺五寸宗之減為二尺

九寸七分縱又減五分為二尺九寸二分蕤賓箱笛晉時二尺九

寸宗之減為二尺六寸縱又減二分為二尺五寸八分

宋書卷十一 志第一 終

西川毛鳳書 氏蘭南甫

宋書卷十二

西川毛鳳書 氏蘭南甫

志第二

宋書十二

曆上

夫天地之所貴者生也萬物之所尊者人也役智窮神無幽不察是以動作云為皆應天地之象古先聖哲擬辰極制渾儀夫陰陽二氣陶育羣品精象所寄是為日月羣生之性章為五木五才之靈五星是也曆所以擬天行而序七耀紀萬國而授人時黃帝使大撓造六甲容成制曆象義和占日常儀占月少昊氏有鳳鳥之瑞以鳥名官而鳳鳥氏司曆顓頊之代南正重司天北正黎司地堯復育重黎之後使治舊職分命羲和欽若昊天故虞書曰棊三百有六旬六日以閏月定四時成歲其後授舜曰天之曆數在爾躬舜亦以命禹爰及殷周二代皆剏業革制而服色從之順其時

朱明篇云劉洪乾象班書僅紀楊偉景初秀史先遺晉武泰如之改曆江左劉智之浮詞並悉詳述以條恭攷補前史於既缺啓後人之纂脩但年代既殊理無斷限陳文太略宜續三國後晉紀未成別修典年之書何必混行注錄如同一家遠載兩漢失尤昭灼律志已明無用煩陳至於馬彪志劉歆之年妄以大初同三統揚雄

感益日之說遷
至采撥為太
何曆上于元嘉
皮延宗不嫌發
難祖曆奏自
大明戴法興議
以六條前何後
沈或論或述此
則禮重稽古
事問知今記
述之上善未容
求疵者也

氣以應天道萬物羣生蒙其利澤三王既謝史職廢官故孔子正
春秋以明司曆之過秦兼天下自以為水德以十月為正服色上
黑漢興襲秦正朔北平侯張蒼首言律曆之事以顛項曆比於六
曆所失差近施用至武帝元封七年太中大夫公孫卿壺遂太史
令司馬遷等言曆紀廢壞宜改正朔易服色所以明受之於天也
乃詔遂等造漢曆選鄧平長樂司馬可及人間治曆者二十餘人
方士唐都分天部洛下閎運算轉曆其法積八十一寸則一日之
分也閎與鄧平所治同於是皆觀星度日月行更以算推如閎平
法一月之日二十九日八十一分日之四十三詔遷用鄧平所造
八十一分律曆以平為太史丞至元鳳三年太史令張壽王上書
以為元年用黃帝調曆令陰陽不調更曆之過詔下主曆使者鮮
于妄人與治曆大司農中丞麻光等二十餘人雜候晦朔弦望二

十四氣又詔丞相御史大將軍右將軍史各一人雜候上林清臺
課諸疏密凡十一家起三年盡五年壽王課疏遠又漢元年不用
黃帝調曆效効壽王逆天地大不敬詔勿効復候盡六年太初曆
第一壽王曆乃太史官殷曆也壽王再効不服竟下吏至孝成時
劉向總六曆列是非作五紀論向子歆作三統曆以說春秋屬辭
比事雖盡精巧非其實也班固謂之密要故漢曆志述之校之何
承天等六家之曆雖六元不同分章或異至今所差或三日或二
日數時考其遠近率皆六國及秦時人所造其術斗分多上不可
檢於春秋下不驗於漢魏雖復假稱帝王祇足以惑時人耳
光武建武八年太僕朱浮上言曆紀不正宜當改治時所差尚微
未遑考正明帝永平中待詔楊岑張盛景防等典治曆但改易加
時弦望未能綜校曆元也至元和二年太初失天益遠宿度相覺

浸多候者皆知日宿差五度冬至之日在斗二十一度晦朔弦望先天一日章帝召治曆編訃李梵等綜核意狀遂下詔書稱春秋保乾圖曰三百年斗曆改憲史官用太初鄧平術有餘分一在三百年之域行度轉差浸以繆錯璇機不正文象不稽冬至之日日在斗二十二度先立春一日則四分之立春日也而以折獄斷大刑於氣已逆用望平和蓋亦遠矣今改行四分以遵堯順孔奉天之文同心敬授儻獲咸熙於是四分法施行黃帝以來諸曆以爲冬至在牽牛初者皆黜焉和帝永元十四年待詔太史霍融上言官漏刻率九日增減一刻不與天相應或時差至二刻半不如夏曆密其年十一月甲寅詔曰漏所以節時分定昏明昏明長短起於日去極遠近日道周圍不可以計率分官漏九日增減一刻違失其實以晷景爲刻密近有驗今下晷景漏刻四十八箭其二十

四氣日所在并黃道去極晷景漏刻昏明中星並列載于續漢律曆志安帝延光三年中謁者亶誦上書言當用甲寅元河南梁豐云當復用太初尚書郎張衡周興皆審曆數難誦豐或不能對或云失誤衡等參案儀注考往校今以爲九道法最密詔下公卿詳議太尉愷等參議太初過天一度月以晦見西方元和改從四分四分雖密於太初復不正皆不可用甲寅元與天相應合圖讖可施行議者不同尚書令忠上奏天之曆數不可任疑從虛以非易是亶等遂寢靈帝熹平四年五官郎中馮光沛相上計掾陳晃等言曆元不正故盜賊爲害曆當以甲寅爲元不用庚申乞本庚申元經緯明文詔下三府與儒林明道術者詳議羣臣會司徒府集議議郎蔡邕曰曆數精微術無常是漢興承秦曆用顓頊元用乙卯百有二歲孝武皇帝始改太初元用丁丑行之百八十九歲孝

章帝改從四分元用庚申今光等以庚申爲非甲寅爲是按曆法黃帝顓頊夏殷周魯各自有元光晁所援則殷曆元也昔始用太初丁丑之後六家紛錯爭訟是非張壽王挾甲寅元以非漢曆雜候清臺課在下第太初效驗無所漏失是則雖非圖讖之元而有効於前者也及用四分以來考之行度密於太初是又新元有效於今者也故延光中亶誦亦非四分言當用甲寅元公卿參議竟不施行且三光之行遲速進退不必若一故有古今之術今術之不能上通於古亦猶古術不能下通於今也又光晁以考靈耀爲本二十八宿度數至日所在錯異不可參校元和二年用至今九十二歲而光晁言陰陽不和姦臣盜賊皆元之咎元和詔書文備義著非羣臣議者所能變易三公從邕議以光晁不敬正鬼薪法詔書勿治臯

何承天曰夫曆數之術若心所不達雖復通人前識無救其爲蔽也是以多歷年歲未能有定四分於天出三百年而益一日積代不悟徒云建曆之本必先立元假言讖緯遂關治亂此之爲蔽亦已甚矣劉歆三統法尤復疏闊方於四分六千餘年又益一日揚雄心惑其說采爲太玄班固謂之最密著于漢志司彪因曰自太初元年始用三統曆施行百有餘年曾不憶劉歆之生不逮太初二三君子言曆幾乎不知而妄言歟

光和中穀城門侯劉洪始悟四分於天疏闊更以五百八十九爲紀法百四十五爲斗分造乾象法又制遲疾曆以步月行方於太初四分轉精微矣魏文帝黃初中太史丞韓翊以爲乾象減斗分太過後當先天造黃初曆以四千八百八十三爲紀法一千二百五爲斗分其後尚書令陳羣奏以爲曆數難明前代通儒多共紛

爭黃初之元以四分曆久遠疏闊大魏受命宜正曆明時韓翊首
建黃初猶恐不審故以乾象互相參校曆三年更相是非合本卽
末爭長短而疑尺丈竟無時而決按三公議皆綜盡曲理殊塗同
歸欲使效之璿璣各盡其法一年之間得失定合於事宜奏可
明帝時尚書郎楊偉制景初曆施用至于晉宋古之爲曆者鄧平
能修舊制新劉洪始減四分又定月行遲疾楊偉斟酌兩端以立
多少之衷因朔積分設差以推合朔月蝕此三人漢魏之善曆者
然而洪之遲疾不可以檢春秋偉之五星大乖於後代斯則洪用
心尚疏偉拘於同出上元壬辰故也

魏明帝景初元年改定曆數以建丑之月爲正改其年三月爲孟
夏四月其孟仲季月雖與正歲不同至於郊祀迎氣祭祠烝嘗巡
狩蒐田分至啓閉班宣時令皆以建寅爲正三年正月帝崩復用

夏正楊偉表曰臣攬載籍斷考曆數時以紀農月以紀事其所由
來遐而尚矣乃自少昊則玄鳥司分顓頊帝嚳則重黎司天唐帝
虞舜則羲和掌日三代因之則世有日官日官司曆則頒之諸侯
諸侯受之則頒于境內夏后之代羲和涸淫廢時亂日則書載胤
征由此觀之審農時而重人事者歷代然也逮至周室旣衰戰國
橫鶩告朔之羊廢而不紹登臺之禮滅而不遵閏分乖次而不識
孟陬失紀而莫悟大火猶西流而怪螿蟲之不藏也是時也天子
不協時司曆不書日諸侯不受職日御不分朔人事不恤廢棄農
時仲尼之撥亂於春秋託褒貶紀正司曆失閏則譏而書之登臺
頒朔則謂之有禮自此以降暨于秦漢乃復以孟冬爲歲首閏爲
後九月中節乖錯時月紕繆加時後天蝕不在朔累載相久而不
革也至武帝元封七年始乃寤其繆焉於是改正朔更曆數使大

才通人造太初曆校中朔所差以正閏分課中星得度以考疏密以建寅之月爲正朔以黃鍾之月爲曆初其曆斗分太多後遂疏闊至元和二年復用四分曆施而行之至於今日考察日蝕率常在晦是則斗分太多故先密後疏而不可用也是以臣前以制典餘日推考天路稽之前典驗之食朔詳而精之更建密歷則不先不後古今中天以昔在唐帝協日正時允釐百工咸熙庶績也欲使當今國之典禮凡百制度皆韜合往古郁然備足乃改正朔更曆數以大呂之月爲歲首以建子之月爲曆初臣以爲昔在帝代則法曰顓頊曩自軒轅則曆曰黃帝暨至漢之孝武革正朔更曆數改元曰太初因各太初曆今改元爲景初宜曰景初曆臣之所建景初曆法數則約要施用則近密治之則皆功學之則易知雖復使研桑心算隸首運籌重黎司晷羲和察景以考天路步驗日

月究極精微盡術數之極者皆未如臣如此之妙也是以累代曆數皆疏而不密自黃帝以來改革不已

壬辰元以來至景初元年丁巳歲積四千四十六算上此元以天正建子黃鐘之月爲曆初元首之歲夜半甲子朔旦冬至

元法萬一千五十八

紀法千八百四十三

紀月二萬二千七百九十五

章歲十九

章月二百三十五

章閏七

通數十三萬四千六百三十

日法四千五百五十九

餘數九千六百七十

周天六十七萬三千一百五十

紀日歲中十二

氣法十二

沒分六萬七千二百一十五

沒法九百六十七

月周二萬四千六百三十八

通法四十七

會通七十九萬一百二十

朔望合數六萬七千三百一十五

入交限數七十二萬二千七百九十五

通周十二萬五千六百二十一

周日日餘二千五百二十八

周虛二千三十一

斗分四百五十五

甲子紀第一

紀首合朔月在日道裏

交會差率四十一萬二千九百一十九

遲疾差率十萬三千九百四十七

甲戌紀第二

紀首合朔月在日道裏

交會差率五十一萬六千五百二十九

遲疾差率七萬三千七百六十七

甲申紀第三

紀首合朔月在日道裏

交會差率六十二萬一百三十九

遲疾差率四萬三千五百八十七

甲午紀第四

紀首合朔月在日道裏

交會差率七十二萬三千七百四十九

遲疾差率一萬三千四百七

甲辰紀第五

紀首合朔月在日道裏

交會差率三萬七千二百四十九

遲疾差率一十萬八千八百四十八

甲寅紀第六

紀首合朔月在日道裏

交會差率開十四萬八百五十九

遲疾差率七萬八千六百六十八

交會紀差十萬三千六百一十求其數之所生者置一紀積月以通數乘之會通去之所去之餘紀差之數也以之轉加前紀則得後紀加之未滿會通者則紀首之歲天正合朔月在日道裏滿去之則月在日道表加表滿在裏加裏滿在表

遲疾紀差三萬一百八十求其數之所生者置一紀積月以通數乘之通周去之餘以減通周所減之餘紀差之數也以之轉減前紀則得後紀不足減者加通周

求次元紀差率轉減前元甲寅紀差率餘則次元甲子紀差率也求次紀如上法也

推朔積月術曰置壬辰元以來盡所求年外所求以紀法除之所
得算外所入紀第也餘則入紀年數年以章月乘之如章歲而一
爲積月不盡爲閏餘閏餘十二以其年有閏閏月以無中氣爲正
推朔術曰以通數乘積月爲朔積分如日法而一爲積日不盡爲
小餘以六十去積日餘爲大餘大餘命以紀算外所求年天正十
一月朔日也

求次月加大餘二十九小餘二千一百四十九小餘滿日法從大
餘命如前次月朔日也小餘二千一百四十以上其月大也

推弦望加朔大餘七小餘千七百四十四小分一小分滿二從小
餘小餘滿日法從大餘大餘滿六十去之餘命以紀算外上弦日
也又加得望下弦後月朔其月蝕望者定小餘如所近中節間限
限數以下者算上爲日望在中節前後各四日以還者視限數望

在中節前後各五日以上者視間限

推二十四氣術曰置所入紀年外所求以餘數乘之滿紀法爲大
餘不盡爲小餘大餘滿六十去之餘命以紀算外天正十一月冬
至日也

求次氣加大餘十五小餘四百二小分十一小分滿氣法從小餘
滿紀從大餘命如前次氣日也

推閏月術曰以閏餘減章歲餘以歲中乘之滿章閏得一月餘滿
半法以上亦得一月數從天正十一月起算外閏月也閏有進退
以無中氣御之

大雪十一月節

限數千二百四十二
間限千二百四十八

冬至十一月中

限數千二百五十四
間限千二百四十五

小寒十二月節

限數千二百三十五
間限千二百二十四

大寒十二月中

限數千二百一十三
間限千一百九十二

立春正月節

限數千一百七十二
間限千一百三十七

雨水正月節

限數千一百一十二
間限千九十三

驚蟄二月節

限數千六十五
間限千二十五

春分二月中

限數千八
間限九百七十九

清明三月節

限數九百五十一
間限九百二十五

穀雨三月中

限數九百
間限八百七十九

立夏四月節

限數八百五十七
間限八百四十七

小滿四月中

限數八百二十二
間限八百一十三

芒種五月節

限數八百
間限七百九十九

夏至五月中

限數七百九十八
間限八百

小暑六月節

限數八百五
間限八百一十五

大暑六月中

限數八百二十五
間限八百四十二

立秋七月節

限數八百五十九
間限八百八十三

處暑七月中

限數九百七
間限九百三十五

白露八月節

限數九百六十二
間限九百九十二

秋分八月中

限數千二十一
間限千五十一

寒露九月節

限數千八十
間限千一百七

霜降九月中

限數千一百三十三
間限一百五十七

立冬十月中

限數千一百八十八
間限千一百九十八

小雪十月中

限數千二百一十五
間限千二百二十九

推沒滅術曰因冬至積日有小餘者加積一以沒分乘之以沒法除之所得為大餘不盡為小餘大餘滿六十去之餘命以紀算外即去年冬至後沒日也

求次沒加大餘六十九小餘五百九十二小餘滿沒法得一從大餘命如前小餘盡爲滅也

推五行用事日立春立夏立秋立冬者卽木火金水始用事日也各減其大餘十八小餘四百八十三小分六餘命以紀算外各四立之前土用事日也大餘不足減者加六十小餘不足減者減大餘一加紀法小分不足減者減小餘一加氣法推卦用事日因冬至大餘六其小餘坎卦用事日也加小餘萬九十一滿元法從大餘卽中孚用事日也

求次卦各加大餘六小餘九百六十七其四正各因其中曰六其小餘

推日度術曰以紀法乘朔積日滿周天去之餘以紀法除之所得爲度不盡爲分命度從午前五起宿次除之不滿宿則天正十一

月朔夜半日所在度及分也

求次日日加一度分不加經斗除斗分少退一度

推月度術曰以月周乘朔積日滿周天去之餘以紀法除之所得爲度不盡爲分命如上法則天正十一月朔夜半月所在度及分也

求次月小月加度二十二分八百六十大月又加二日度十三分六百七十九分滿紀法得一度則次月朔夜半月所在度及分也其冬下旬夕在張心暑也

推合朔度術曰以章歲乘朔小餘滿通法爲大分不盡爲小分以大分從朔夜半日度分滿紀法從度命如前則天正十一月合朔日月所共合度也

求次月加度二十九大分九百七十七小分四十二小分滿通法

從大分大分滿紀法從度經斗除其分則次月合朔日月所共合度也

推弦望日所在度加合朔度七大分七百五小分十微分一微分滿二從小分小分滿通法從大分大分滿紀法從度命如前則上弦日所在度也又加得望下弦後月合也

推弦望月所在度加合朔度九十八大分二百七十九小分三十四數滿命如前即上弦月所在度也又加得望下弦後月合也推日月昏明度術曰日以紀法月以月周乘所近節氣夜漏二百而一爲明分日以減紀法月以減月周餘爲昏分各以加夜半如法爲度

推合朔交會月蝕術曰置所入紀朔積分以所入紀交會差率之數加之以會通去之餘則所求年天正十一月合朔去交度分也數各加其月合朔去交度分滿會通去之餘則各其月望去交度分也朔望去交分加朔望合數以下入交限數以上者朔則交會望則月蝕

推合朔交會月蝕月在日道表裏術曰置所入紀朔積分以所入紀下交會差率之數加之倍會通去之餘不滿會通者紀首表天正合朔月在表紀首裏天正合朔月在裏滿會通去之表在裏裏在表

求次月以通數加之滿會通去之加裏滿在表加表滿在裏先交會後月蝕者朔在表則望在表朔在裏則望在裏先月蝕後交會者看食月朔在裏則望在表朔在表則望在裏交會月蝕如朔望會數以下則前交後會如入交限數以上則前會後交其前交後

會近於限數者則豫伺之前月前會後交近於限數者則後伺之
後月

求去交度術曰其前交後會者今去交度分如日法而一所得則
却去交度也其前會後交者以去交度分減會通餘如日法而一
所得則前去交度餘皆度分也去交度十五以上雖交不蝕也十
以下是蝕十以上虧蝕微少光晷相及而已虧之多少以十五為法
求日蝕虧起角術曰其月在外道先交後會者虧蝕西南角起先
會後交者虧蝕東南角起其月在內道先交後會者虧蝕西北角
起先會後交者虧蝕東北角起虧蝕分多少如上以十五為法會
交中者蝕盡月蝕在日之衝虧角與上反也

月行遲疾度 損益率 盈縮積分 月行分

一日 十四度_{分十四} 益二十六 盈一_切

二百七十

二日 十四度_{分十一} 益二十三 盈積分一十一萬八千五

百三十四

一百七十七

三日 十四度_{分八} 益二十 盈積分二十二萬三千三

百九十一

二百七十四

四日 十四度_{分五} 益十七 盈積分三十一萬四千五

百七十一

二百七十

五日 十四度_{分一} 益十三 盈積分三十九萬二千七

十四

三百六十七

六日 十三度_{分十四}

益七

盈積分四十五萬二千三

百四十一

二百六十一

七日 十三度_{分七}

損十五

盈積分四十八萬三千二

百五十四

二百五十四

八日 十三度_{分一}

損六

盈積分四十八萬三千二

百五十四

二百四十八

九日 十二度_{分十六}

損十

盈積分四十五萬五千九

百

二百四十四

十日 十二度_{分十三}

損十三

盈積分四十一萬三百一

十

二百四十一

十一日 十二度_{分十一}

損十五

盈積分三十五萬一千四

十三

二百三十九

十二日 十二度_{分八}

損十八

盈積分二十八萬二千六

百五十八

二百三十六

十三日 十二度_{分五}

損二十一

盈積分二十萬五百九十

六

二百三十三

十四日 十二度分三

損二十三

盈積分十萬四千八百五

十七

二百三十一

十五日 十二度分五

益二十一

縮初

二百三十三

十六日 十二度分七

益十九

縮積分九萬五千七百三

十九

二百三十五

十七日 十二度分九

益十七

盈積分十八萬二千三百

六十

二百三十七

十八日 十二度分十二

益十四

縮積分二十五萬九千八

百六十三

二百四十

十九日 十二度分十五

益十一

縮積分三十二萬三千六

百八十九

二百四十三

二十日 十二度分十八

益八

縮積分三十七萬三千八

百三十八

二百四十六

二十一日 十三度分三

益四

縮積分四十一萬三百一

十

二百五十

二十二日 十三度七分 損 縮積分四十二萬八千五

百四十六

二百五十四

二十三日 十三度十二分 損五 縮積分四十一萬八千五

百四十六

二百

二十四日 十三度十八分 損十一 縮積分四十萬五千七百

五十一

二百六十五

二十五日 十四度五分 損十七 縮積分三十五萬五千六

百二

二百七十一

二十六日 十四度十一分 損二十三 縮積分二十七萬八千六

十九

二百七十七

二十七日 十四度十一分 損二十四 縮積分十七萬三千二百

四十二

二百七十八

周日 十四度十三分有小分六 損二十四有小分六 縮積分六萬三千八

百二十六

二百七十九有小分六

推合朔交會月蝕入遲疾曆術曰置所入紀朔積分以所入紀下遲疾差率之數加之以通界去之餘滿日法得一日不盡為日餘命日算外則所求年天正十一月合朔入曆日也

求次月加一日餘四千四百五十求望加十四日日餘三千四百八十九日餘滿日法成日日滿二十七去之又除餘如周日餘日餘不足除者減一日加周虛

推合朔交會月蝕定大小餘以入曆日乘所入曆損益率以損益盈縮積分爲定積分以章歲減所入曆月行分餘以除之所得以盈減縮加本小餘加之滿日法者交會加時在後日減之不足者交會加時在前日月蝕者隨定大小餘爲日加時入曆在周日者以周日日餘乘縮積分爲定積分以率損乘入曆日餘又以周日日餘乘之以周日日度小分并之以損定積分餘爲後定積分以章歲減周日月行分餘以周日日餘乘之以周日日度小分并之以除後定積分所得以加本小餘如上法

推加時以十二乘定小餘滿日法得一辰數從子起算外則朔望

加時所在辰也有餘不盡者四之如日法而一爲少二爲半三爲太又有餘者三之如日法而一爲強半法以上排成之不滿半法廢弃之以強并少爲少強并半爲半強并太爲太強得二強者爲少弱以之并少爲半弱以之并半爲太弱以之并大爲一辰弱以所在辰命之則各得其少大半及強弱也其月蝕望在中節前後四日以還者視限數五日以上者視間限定小餘如間限限數以下者以算上爲日

斗二十六

分四百五十五

牛八

女十二

虛十

危十七

室十六

壁九

北方九十八度分四百五十五

奎十六

婁十二

胃十四

昴十一

畢十六

觜二

參九

西方八十度

井三十三

鬼四

柳十五

星七

張十八

翼十八

軫十七

南方百一十二度

角十二

亢九

氐十五

房五

心五

尾十八

箕十一

東方七十五度

中節日所在度

日行黃道去極度

日中晷景

晝漏刻

夜漏刻

昏中星

明中星

冬至

十一月申斗
二十二少

百一十五度

丈三尺

四十五

五十五

奎六

弱

亢二

少強

小寒

十二月節
女二少

百一十三

強

丈二尺三寸

四十五

八分

五十四

二分

婁五

半強

氏七

強

大寒 十二月也 虛女半強

百一十 大弱

丈一尺

四十六 八分

五十三 二分

胃十一 大強

心半

立春 正月節危 十大弱

百六 少弱

九尺六寸

四十八 六分

五十一 四分

畢五 少弱

尾七 半弱

雨水 正月中室 八大強

百一 強

七尺九寸 五分

五十 八分

四十九 二分

參六 半弱

箕 半弱

驚蟄 二月節 壁八強

九十五 強

六尺五寸

五十三分三

四十六分七

井十七弱少

斗初少

春分二月中奎十四少強

八十九強少

五尺二寸分五

五十五分八

四十四分二

鬼四

斗十一弱

清明三月節胃二半

八十三弱少

四尺一寸分五

五十八分二

四十一分七

星四太

斗二十一半

穀雨三月中昴二大

七十七強大

三尺二寸

六十分五

三十九分五

張十七

牛六半

立夏四月節 畢六太

七十三弱少

二尺五寸二分

六十二分四

三十七分六

翼十七太

女十弱少

小滿四月中 參 四少弱

六十九太

尺九寸分八

六十三分九

三十六分一

角弱大

危弱太

芒種五月節 井 十半弱

六十七弱少

尺六寸分八

六十四分九

三十五分一

亢五太

危十四強

夏至五月中 井 五半強

六十七強

尺五寸

六十五

三十五

氏十二少弱

室十二強

小暑六月節柳
二太強

六十七太強

尺七寸

六十四七分

三十五三分

尾一太強

奎二太強

大暑六月中
星四強

七十

二尺

六十三八分

三十六二分

尾十五半強

婁三太

立秋七月節張
十二少

七十三半強

二尺五寸五分

六十二三分

三十七七分

箕九

太強

胃九

太弱

處暑

七月中 翼九半

七十八

半強

三尺三寸

三分

六十二

二分

三十九

八分

斗十

少

畢三

太

白露

八月節 軫六太

八十四

少強

四尺三寸

五分

五十七

八分

四十二

二分

斗二十一

強

參五

少強

秋分

八月中 角五弱

九十

半強

五尺五寸

二分

五十五

二分

四十四

八分

牛五

少

井十六

少強

寒露

九月節 亢八半弱

九十六太強

六尺八寸五分

五十二分六

四十七分四

女七太

鬼三少強

霜降九月中戌十四少強

百二少強

八尺四寸

五十三分三

四十九分七

虛六太

星三太

立冬十月節尾四半強

百七少強

丈八寸分三

四十八分二

五十一分八

危八強

張十五太強

小雪十月中箕一太強

百一十一弱

丈一尺四寸

四十六分七

五十三三分

室三半強

翼十五太

大雪十一月節廿六

百一十三太強

丈二尺五寸六分

四十五三分

五十四五分

壁半強

軫十五少強

右中節二十四氣如術求之得冬至十一月中也加之得次月節加節得其月中中星以日所求為正置所求年二十四氣小餘四之

如法得二為少不盡少三之如法為強所以減其節氣昏明中星各定

推五星術

五星者木曰歲星火曰熒惑土曰填星金曰太白水曰辰星凡五星之行有遲有疾有留有逆曩自開闢清濁始分則日月五星聚于星紀發自星紀竝而行天遲疾留逆互相逮及星與日會同宿共度則謂之合從合至合之日則謂之終各以一終之日與一歲之日通分相約終而率之歲數歲則謂之合終歲數歲終則謂之合終合數二率既定則法數生焉以章歲乘合數為合月法以紀法乘合數為日度法以章月乘歲數為合月分如合月法為合月數合月之餘為月餘以通數乘合月數如日法而一為大餘以六十去大餘餘為星合朔大餘之餘為朔小餘以通數乘月餘以合月法乘朔小餘并之以日法乘合月法除之所得星合入月日數

也餘以朔通法約之爲入月日以朔小餘減日法餘爲朔虛分以曆斗分乘合數爲星度斗分木火土各以合數減歲數餘以周天乘之如日度法而一所得則行星度數也餘則度餘金水以周天乘歲數如日度法而一所得則行星度數也餘則度餘木合終歲數千二百五十三

合終合數千一百四十九

合月法二萬一千八百三十一

日度法二百一十一萬七千六百七

合月數十三

月餘萬一千一百二十二

朔大餘二十三

朔小餘四千九十三

入月日十五

日餘百九十九萬五千六百六十四

朔虛分四百六十六

斗分五十二萬二千七百九十五

行星度三十三

度餘百四十七萬二千八百

火合終歲數五千一百五

合終合數二千三百八十八

合月法四萬五千三百七十二

日度法四百四十萬一千八十四

合月數二十六

月餘二萬三

朔大餘四十七

朔小餘三千六百二十七

入月日十三

日餘三百五十八萬五千二百三十

朔虛分九百三十二

斗分百八萬六千五百四十

行星度五十

度餘百四十一萬二千一百五十

土合終歲數二千九百四十三

合終合數三千八百九

合月法七萬二千三百七十一

日度法七百一萬九千九百八十七

合月數十二

月餘五萬八千一百五十三

朔大餘五十四

朔小餘千六百七十四

入月日二十四

日餘六十七萬五千三百六十四

朔虛分二千八百八十五

斗分百七十三萬三千九十五

行星度十二

度餘五百九十六萬二千二百五十六

金合終歲數千九百七

合終合數二千三百八十五

合月法四萬五千三百一十五

日度法四百三十九萬五千五百五十五

合月數九

月餘四萬三百一十

朔大餘二十五

朔小餘三千五百三十五

入月日二十七

日餘十九萬四千九百九十

朔虛分千二十四

斗分百八萬五千一百七十五

行星度二百九十二

度餘十九萬四千九百九十

水合終歲數一千八百七十

合終合數萬一千七百八十九

合月法二十二萬三千九百九十一

日度法二千一百七十二萬七千一百二十七

合月數一

月餘二十一萬五千四百五十九

朔大餘二十九

朔小餘二千四百一十九

入月日二十八

日餘二千三十四萬千二百六十一

朔虛分二千一百四十

斗分五百三十六萬三千九百九十五

行星度五十七

度餘二千三十四萬四千二百六十一

推五星術曰置壬辰元以來盡所求年以合終合數乘之滿合終歲數得一名積合不盡名合餘以合終合數減合餘得一者星合往年得二者合前往年無所得合其年餘以減合終合數爲度分金水積合偶爲晨奇爲夕

推五星合月以月數月餘各乘積合餘滿合月法從月爲積月不盡爲月餘以紀月除積月所得算外所入紀也餘爲入紀月副以章閏乘之滿章月得一爲閏以減入紀月餘以歲中去之餘爲入歲月命以天正起算外星合月也其在閏交際以朔御之

推合月朔以通數乘入紀月滿日法得一爲積日不盡爲小餘以六十去積日餘爲大餘命以所入紀算外星合朔日也

推入月日以通數乘月餘合月法乘朔小餘并之通法約之所得滿日度法得一則星合入月日也不滿爲日餘命日以朔算外入月日也

推星合度以周天乘度分滿日度法得一爲度不盡爲餘命以牛前五度起算外星所合度也求後合月以月數加入歲月以餘加月餘餘滿合月法得一月月不滿歲中卽在其年滿去之有閏計焉餘爲後年再滿在後二年金水加晨得夕加夕得晨也

求後合朔以朔大小餘數加合朔月大小餘其月餘上成月者又加大餘二十九小餘一千四百一十九小餘滿日法從大餘命如

前法

求後入月日入以月日日餘加入月日及餘餘滿日度法得一其前合朔小餘滿其虛分者去一日後小餘滿二千四百一十九以

上去二十九日不滿去三十日其餘則後合入月日命以朔求後合度以度數及分如前合宿次命之

木晨與日合伏順十六日九十九萬七千八百三十二分行星二度百七十九萬五千二百三十八分而晨見東方在日後順疾日行五十七分之十一五十七日行十一度順遲日行九分五十七日行九度而留不行二十七日而旋逆日行七分之一八十四日退十二度而復留二十七日復遲日行九分五十七日行九度而復順疾日行十一分五十七日行十一度在日前夕伏西方順十六日九十九萬七千八百三十二分行星二度百七十九萬五千二百三十八分而與日合凡一終三百九十八日百九十九萬五千六百六十四分行星三十三度百四十七萬二千八百六十九分

火晨與日合伏七十二日百七十九萬二千六百一十五分行星五十六度百二十四萬九千三百四十五分而晨見東方在日後順日行二十三分之十四百八十四日行百一十二度更順遲日行十二分九十二日行四十八度而留不行十一日而旋逆日行六十二分之十七六十二日退十七度而復留十一日復順遲日行十二分九十二日行四十八度而復疾日行十四分百八十四日行百一十二度在日前夕伏西方順七十二日百七十九萬二千六百一十五分行星五十六度百二十四萬九千三百四十五分而與日合凡一終七百八十八日三百五十八萬五千二百三十分行星四百一十五度二百四十九萬八千六百九十分

土晨與日合伏十九日三百八十四萬七千六百七十五分半行星二度六百四十九萬一千一百二十一分半而晨見東方在日

後順行百七十二分之十三八十六日行六度半而留不行三十
二日半而旋逆日行十七分之一百二日退六度而復留不行三
十二日半復順日行十三分八十六日行六度半在日前夕伏西
方順十九日三百八十四萬七千六百七十五分半行星二度六
百四十九萬一千一百二十一分半而與日合凡一終三百七十
八日六十七萬五千三百六十四分行星十二度五百九十六萬
二千二百五十六分

金晨與日合伏六日退四度而晨見東方在日後而逆遲日行五
分之三十日退六度留不行七日而旋順遲日行四十五分之三
十三四十五日行三十三度而順疾日行一度九十一分之十四
九十一日行百五度而順益疾日行一度九十一分之二十一
九十一日行百一十二度在日後而晨伏東方順四十二日十九萬

四千九百九十分行星五十二度十九萬四千九百九十分而與
日合一合二百九十二日十九萬四千九百九十分行星如之
金夕與日合伏順四十二日十九萬四千九百九十分行星五十
二度十九萬四千九百九十分而夕見西方在日前順疾日行一
度九十一分之二十一九十一日行百一十二度而更順遲日行
一度十四分九十一日行百五度而順益遲日行四十五分之三
十三四十五日行三十三度而留不行七日而旋逆日行五分之
三十日退六度在日前夕伏西方逆六日退四度而與日合凡再
合一終五百八十四日三十八萬九千九百八十分行星如之
水晨與日合伏十一日退七度而晨見東方在日後逆疾一日退
一度而留不行一日而旋順遲日行八分之七八日行七度而順
疾日行一度十八分之四十八日行二十二度在日後晨伏東方

順十八日二千三十四萬四千二百六十一分行星三十六度二千三十四萬四千二百六十一分而與日合凡一合五十七日二千三十四萬四千二百六十一分行星如之

水夕與日合伏十八日二千三十四萬四千二百六十一分行星三十六度二千三十四萬四千二百六十一分而夕見西方在日前行八分之七八日行七度而留不行一日而旋逆一日退一度在日前夕伏西方逆十一日退七度而與日合凡再合一終百一十五日千八百九十六萬一千三百九十五分行星如之

五星曆步術以法伏日度餘加星合日度餘滿日度法得一從全命如之前得星見日及度餘也以星行分母乘見度分如日度法得一分不盡半法以上亦得一而日加所行分分滿其母得一度

逆順母不同以當行之母乘故分如故母而一當行分也留者承前逆則減之伏不書度除斗分以行母爲率分有損益前後相御凡五星行天遲疾留逆雖大率有常至犯守逆順難以術推月之行天猶有遲疾況五星乎唯日之行天有常進退有率不遲不疾不外不內人君德也

求木合終歲數法以木日度法乘一木終之日內分周天除之卽得也

求木合終合數法以木日度法乘周天滿紀法所得復以周天除之卽得五星皆放此也

魏黃初元年十一月小巳卯葭首巳亥歲十一月巳卯朔旦冬至臣偉上

劉氏在蜀不見改曆常是仍用漢四分法吳中書令闕澤受劉洪

乾象法於東萊徐岳字公河故孫氏用乾象曆至于吳亡
晉武帝泰始元年有司奏王者祖氣而奉其嫡終晉於五行之次
應尚金金生於巳事於酉終於丑宜祖以酉日臘以丑日改景初
曆為泰始曆奏可

史臣按鄒衍五德周為火行衍生在周時不容不知周氏行運且
周之為曆年八百秦氏即有周之建國也周之火木其事易詳且
五德更王唯有二家之說鄒衍以相勝立體劉向以相生為義據
以為言不得出此二家者假使即劉向之說周為木行秦氏代周
改其行運若不相勝則克木者金相生則木實生火秦氏乃稱水
德理非謬然斯則劉氏所證為不值矣臣以為張蒼雖是漢臣生
與周接司秦柱下備觀圖書且秦雖滅學不廢術數則有周遺文
雖不畢在據漢水行事非虛作賈誼取秦云漢土德蓋以是漢代

秦詳論二說各有其義張蒼則以漢水勝周火廢秦不班五德賈
誼則以漢土勝秦水以秦為一代論秦漢雖殊而周為火一也然
則相勝之義於事為長若同蒼黜秦則漢水魏土晉木宋金若同
賈誼取秦則漢土魏木晉金宋火也難者云漢高斷地而神母夜
哭云赤帝子殺白帝子然則漢非火而何斯又不然矣漢若為火
則當云赤帝不宜云赤帝子曰帝子又何義況乎蓋由漢是土
德土生乎火秦是水德水生乎金斯則漢以土為赤帝子秦以水
德為白帝子也難者又曰向云五德相勝今復云土為赤帝子何
也答曰五行自有相勝之義自有相生之義不得以相勝廢相生
相生廢相勝也相勝者以土勝水耳相生者土自火子義豈相關
崔寔四人月令曰祖者道神黃帝之子曰累祖好遠遊死道路故
祀以為道神合祖賦序曰漢用丙午魏用丁未晉用孟月之酉曰

何不互
云黃帝
殺黑帝
九錫

火

李

或始字

莫識祖之所由說者云祈請道神謂之祖有事於道者君子行役則列之於中路喪者將遷則稱名於階庭或云百代遠祖名謚彫滅墳塋不復存於銘表游魂不得託於廟祧故以初歲良辰建華蓋揚綵旌將以招靈爽庶衆祖之來憑云爾

晉江左時侍中平原劉智推三百年斗曆改憲以爲四分法三百年而減一日以百五十爲度法三十七爲斗分飾以浮說以扶其理江左中領軍琅邪王朔之以其上元歲在甲子善其術欲以九萬七千歲之甲子爲開闢之始何承天云悼於立意者也景初曰中晷景卽用漢四分法是以漸就乖差其推五星則甚疎闊晉江左以來更用乾象五星法以代之猶有前却

宋太祖頗好曆數太子率更令何承天私撰新法元嘉二十年上表曰臣授性頑惰少所關解自昔幼年頗好曆數耽情注意迄不

白首臣亡舅故秘書監徐廣素善其事有既往七曜曆每記其得失自太和至泰元之末四十許年臣因比歲考校至今又四十載故其疎密差會皆可知也夫圓極常動七曜運行離合去來雖有定勢以新故相涉自然有毫末之差連日累歲積微成著是以虞書著欽若之典周易明治曆之訓言當順天以求合非爲合以驗天也漢代雜候清臺以昏明中星課日所在雖不可見月盈則蝕必當其衝以月推日則躔次可知焉捨易而不爲役心於難事此臣所不解也堯典云日永星火以正仲夏今季夏則火中又宵中星虛以殷仲秋今季秋則虛中爾來二千七百餘年以中星檢之所差二十七八度則堯冬令至日在須女十度左右也漢之太初曆冬至在牽牛初後漢四分及魏景初法同在斗二十一臣以月蝕檢之則景初今之冬至應在斗十七又史官受詔以土圭測景

考校二至差三日有餘。從來積歲及交州所上檢其增減亦相符。驗然則今之二至非天之二至也。天之南日在斗十三四矣。此則十九年七閏數微多差。復改法易章則用筭滋繁。宜當隨時遷革以取其合。案後漢志春分日長秋分日短。差過半刻。尋二分在二至之間。而有長短。因識春分近夏至。故長秋分近冬至。故短也。楊偉不悟。卽用之上曆表云。自古及今。凡諸曆數皆未能並已之妙。何此不曉。亦何以云是。故臣更建元嘉曆。以六百八爲一紀。半之爲度法。七十五爲室分。以建寅之月爲歲首。雨水爲氣初。以諸法閏餘一之歲爲章首。冬至從上三日五時日之所在。移舊四度。又月有遲疾。合朔月蝕不在朔望。亦非曆意也。故元嘉皆以盈縮定其小餘。以正朔望之日。伏惟陛下允迪聖哲。先天不違。劬勞庶政。寅亮鴻業。究淵思於往籍。探妙旨於未聞。窮神知化。罔不該覽。是

以愚臣欣遇盛明。効其管穴。伏願以臣所上元嘉法。下史官考其疎密。若謬有可採。庶或補正。闕謬以備萬分。詔曰。何承天所陳殊有理據。可付外詳之。太史令錢樂之兼丞嚴粲奏曰。太子率更令領國子博士何承天表更改元嘉曆法。以月蝕檢今冬至日在斗十七。以土圭測影。知冬至已差三日。詔使付外檢署。以元嘉十一年被勅使考月蝕。土圭測影。檢署由來用偉景初法。冬至之日。日在斗二十一。度少檢十一年七月十六日望月蝕。加時在卯。到十五。日四更二唱。丑初始蝕。到四唱。蝕既在營室十五度末。景初其日日在軫三度。以月蝕所衝考之。其日日應在翼十五度半。又到十三年十二月十六日望月蝕。加時在酉。到亥。初始食。到一更三唱。蝕既在鬼四度。景初其日日在女三。以衝考之。其日日應在牛六度半。又到十四年十二月十六日望月蝕。加時在戌之半。到二

更四唱亥末始蝕。到三更一唱蝕。既在井三十八度。景初其日日在斗二十五。以衝考之。其日日應在斗二十二度半。到十五年五月十五日望月蝕。加時在戌。其日月始生而已蝕。光已生四分之。一格在斗十六度許。景初其日日在井二十四。考取其衝。其日日應在井二十。又到十七年九月十六日望月蝕。加時在子之少。到十五日未二更一唱始蝕。到三唱蝕十五分之十二。格在昴一度半。景初其日在房二。以衝考之。則其日日在氐十三度半。凡此五蝕。以月衝一百八十二度半考之。各至之日。日並不在斗二十一度少。並在斗十七度半間。悉如承天所上。又去十一年起。以土圭測景。其年景初法十一月七日冬至。前後陰不見影。到十二年十一月十八日冬至。其十五日影極長。到十三年十一月二十九日冬至。其二十六日影極長。到十四年十一月十一日冬至。其前後

並陰不見。到十五年十一月二十一日冬至。十八日影極長。到十六年十一月二日冬至。其十月二十九日影極長。到十七年十一月十三日冬至。其十日影極長。到十八年十一月二十五日冬至。二十一日影極長。到十九年十一月六日冬至。其三日影極長。到二十年十一月十六日冬至。其前後陰不見影。尋校前後以影極長。為冬至。並差三日。以月蝕檢日所在。已差四度。土圭測影。冬至又差三日。今之冬至。乃在斗十四間。又如承天所上。又承天法。每月朔望及弦。皆定大小餘。於推交會時刻。雖審皆用盈縮。則月有頻三大。頻二小。比舊法殊為異。舊日蝕不唯在朔。亦有在晦。及二日。公羊傳所謂或失之前。或失之後。愚謂此一條。自宜仍舊。員外散騎郎皮延宗。又難承天。若晦朔定大小餘。紀首值盈。則退一日。便應以故歲之晦。為新紀之首。承天乃改新法。依舊術。不復每月

定大小餘如延宗所難太史所上有司奏治曆改憲經國盛典爰
及漢魏屢有變革良由術無常是取協當時方今皇猷載暉舊域
光被誠應綜覈晷度以播維新承天曆術合可施用宋二十二年
普用元嘉曆詔可

宋書卷十二 志第二 終

魏州毛鳳苞
氏書印

